



ル 5
1574
25



門
凡呂5
號
1574
卷
25

嘉興府志卷五十二

列傳

秀水縣

明

呂原字遠原父嗣為萬泉牧諭兄本京州西門外人
養侯州刺史本州刺史官不詳其子孫亦不詳
知府黃想其本州刺史官不詳其子孫亦不詳
崇正六年舉人

嘉興府志卷五十二

嘉興府知府善化許瑤光重輯

列傳

秀水縣

明

呂原字逢原父嗣芳萬泉教諭兄本景州訓導嗣芳老就
養景州與本相繼卒貧不能歸葬原奉母南旋家益貧
知府黃懋奇其才是時知府得輒補生員懋卽遣原入
學正統六年舉鄉試第一明年會試第二編修累進左
春坊大學士旋命入內閣預機務石亨曹吉祥用事貴

倨獨敬原原朝會衣青袍亨笑曰行爲先生易緋原不
答有投匿名書指曹石奸者上募能捕賞官令岳正擬
榜原與正諫曰爲政有體盜賊責兵部姦宄責法司豈
有天子出榜購募之理事得寢尋與正列曹石罪狀疏
會承天門災正草罪已詔曹石乃摘其語謂謗訕上大
怒厲聲曰正大膽敢爾原素恭謹阿正何也衆爲原懼
原曰忠愛分也死生天也何懼爲已而罷正留原與李
賢同入內閣賢通達遇事立斷原濟以持重庶政稱理
遭母喪水漿不入口三日詔葬畢卽起視事乞終制不
允乃之景州啟父兄殯以歸哀毀羸瘠抵家甫葬而卒

贈禮部左侍郎諡文懿原內剛外和與物無競性儉約
身無紈綺分祿恤宗姻歸裝惟賜衣數襲而已有介庵

集十二卷

明史本傳參徵獻
錄程敏政遺事記

項忠字蓋臣正統七年進士由刑部郎中選廣東副使按
行高州謀報賊攜男女數百剽村落忠曰賊無攜家理
必掠良民也戒諸將毋妄殺已訊所俘獲果然盡釋之
天順初任陝西按察使時連歲災傷忠發廩賑且請輕
罪納米民賴以濟陞巡撫洮岷羌叛忠言羌志在劫掠
盡誅則傷仁遷撫則不威乃發兵據險揚聲進討衆盡
降西安水泉鹵不可飲爲開龍首渠及阜河引水入城

又疏鄭白二渠溉涇陽三原醴泉高陵臨潼五縣田七萬餘頃成化四年千戶滿俊反俊素藏匿姦盜出邊抄掠會有獄連俊有司跡逋至其家多要求俊怒遂激衆亂守臣遣俊姪指揮瑋往捕俊劫瑋叛入據石城卽唐吐番石堡城山上有城砦四面峭壁中鑿五石井以貯水惟一徑可緣而上有衆二萬關中震動乃命忠總督軍務與監軍太監劉祥總兵劉玉率兵討之忠與巡撫馬文升分軍七道抵石城下與戰斬獲多伏羌伯毛忠乘勝奪其西北忽中流矢死玉亦被圍諸軍欲退忠斬一千戶以徇衆力戰玉得出乃列圍困之日薄城下焚

芻草絕汲道賊窘欲降邀忠與文升相見忠偕劉玉單騎赴之文升亦從數十騎至呼俊瑋諭以速降賊遙望羅拜忠直前挾瑋以歸俊氣阻猶豫不出賊將楊虎豹夜出汲被擒忠貫其死諭以購賊賞格示之金且賜金帶鈎縱歸使誘俊出戰伏兵擒焉急擊下石城盡獲餘寇毀其城增一衛於固原西北西安廢城留兵戍之而還論功進右都御史巡視順天河間永平水災賑活饑民二十七萬白圭旣平劉通荆襄間流民屯結如故通黨李原掠南漳房內鄉渭南諸縣流民附者百萬詔忠總督軍務忠先遣人招諭流民歸者四十餘萬調土兵

分八道逼之流民歸者又數萬賊潛伏山砦伺間出劫
遇於竹山乘溪漲半渡截擊賊多溺死復招流民五十
萬斬首六百四十俘八百有奇家口三萬餘人戶選一
丁戍湖廣邊衛餘令歸籍給田疏陳善後十事悉允行
忠令下民有驅逼不前者即殺之有自洪武中占籍亦
在遣中給事中梁璟劾忠妄殺白圭亦言流民既成業
者宜隨在著籍帝皆不聽進忠左都御史忠上疏言賊
黨罪固當死正因不忍濫誅故令壯丁謫發遣戍其久
附籍者乃占山四十餘里招聚無賴千人爭鬪劫殺可
以久居故不遣乎臣揭榜曉賊謂已殺千人蓋張虛勢

非實事也帝溫詔答之八年召還掌院事尋拜刑部尚

書轉兵部內閣汪直黨吳綬誣忠罪斥為民直敗復官

家居二十六年與里人梅江戴祐姜諒伍芳包鼐湯篪

陳蒙福教授蕭子鵬為樵李耆英會有倡和詩一集卒

贈太子太保諡襄毅有藏史居集

明史本傳
參徵獻錄

金鼎字宗器正統乙丑進士歷陞工部虞衡司員外郎扈

駕北征死土木之難

徵獻錄參柳志 案舊府縣志選
舉門正統乙丑秀水無登進士者

鼎傳作監生與徵
獻錄不符俟考

施奎字漢章正統丁卯舉人任六安州學正遷遼府右長

史王待以殊禮荆州故大都姦宄百出本府軍校不法

嚴號令誅首惡一郡帖然坐累降南安府同知歸南安

士民數百人乞本郡牒至浙問安否稱其持身廉謹蒞

政公勤革弊除奸愛民如子俟回文述起居以慰百姓

卒項忠志其墓有竹坡稿十二卷

徵獻錄
參吳志

金禮字敬之幼有神童之目景泰甲戌進士授南吏部主

事歷刑部郎中出為雲南參議征鐵索橋苦竹箐諸蠻

冒瘴癘深入踰月賊平病乞歸家居儉約不事矜飾郡

守楊繼宗每造廬咨政事

袁志參
徵獻錄

姜諒字用貞天順甲申進士歷南刑部郎中出知漳州大

早多盜發廩賑貸悉歸化捕不率者盜遂絕龍溪漳浦

田瀕海築長隄障之又濬塘渠置社倉作義冢立鄉約

及田賦為里胥飛射詭寄者悉勘復其舊按戶計丁分

三等遇徭役酌量輕重授之民咸悅服建宋儒高登陳

涪祠以講學親老歸漳民祀焉

浙江通志
參徵獻錄

姚俊字用章祖謙有隱德俊天順甲申進士歷刑部郎中

出為廣東僉事時苗寇不靖御史韓雍鎮兩廣委以軍

事協平蠻寇方論功而奔父喪素羸哀毀卒

徵獻
錄

梅江字文淵本宣城人聖俞之後成化己丑進士授廬江

令擢南京貴州道御史時儲位未定首疏力請上嘉納

奉命按兩廣寬恤部伍招撫流移遷四川僉事決疑獄

數十案蜀人以梅鏡稱之

兩浙名賢錄
參徵獻錄

陸遠字德毅成化乙未進士知海州一日行部有旋風三
而馬首疑有冤令吏卒邏察之有人死樹下折擔尺許
貫喉乃土人殺買牛者移尸於此密擒之一訊而服擢

廣東按察司僉事

趙圖記參
浙江通志

項經字誠之忠子成化丁未進士由御史出知太平府植
歲祲役繁撫恤流亡來歸者萬計移治臨江與袁筠諸
郡接壤土寇出沒其間前有司率玩愒慮變弗敢動經
置諸豪賊於法一郡大治逾年飢有司方請賑經曰民
飢甚矣必請而賑是懸口以待斃也賑而勿請罪在太

守於是發府庫金建和糴法民賴以濟時鹽司督賦方
急經不奉命司怒繼而歲大稔民入賦恐後為諸郡最
時劉瑾用事經獨勿予賂瑾授意吏部檄休致經弟綬
為錦衣衛指揮征苗有功瑾怒經矯詔逮綬獄戍遼瑾
誅諸賂者皆敗臺諫薦經抗直可大用上疏辭以江南
右參政致仕子錫字秉仁號餅山嘉靖癸未進士知建
陽縣恭儉愛人遇訟者必從容開諭建宋賢祠集諸生
講學擢刑部主事歷南光祿正卿寺費為羣璫乾沒錫
一意釐剔璫喉外臺劾之論降後為南鴻臚卿綬子鈞
壬戌進士官刑部郎錫子治元丙辰進士官吏部郎

李構

往哲傳參
徵獻錄

施德字克明成化辛卯舉人性剛直居鄉卽以鋤強扶弱
爲已任知濮州興學勸課洗冤滯賑貧乏豪右懾服士
民述其善政二十餘條梓行之遷岳州府同知政如治
濮引疾歸寓情詩酒以壽終吳志參
徵獻錄

呂憲字秉之原子蔭補國子生供事翰林授中書舍人成
化辛卯乞應順天鄉試所司執故事不許上特許之遂
中式舍人得赴試自憲始遷禮部主客司郎中典屬國
事憲好學能文諳掌故琉球請歲一入貢回回貢使乞
道廣東歸國皆以非制格之進南京太僕寺少卿故事

太僕馬數不令他官知以是文籍磨滅無稽憲曰他官
不與聞是也當職者可買買耶議請三年一較勘著爲
例遷太常卿輯典故因革若干卷劉瑾用事再疏乞歸

有九柏山房稿明史參徵獻
錄明詩綜

戴祐選舉表
作佑字元吉成化丙戌進士試御史稱敢諫僉事

福建浦城逋稅多令督之急民變臺鎮檄兵勦之祐謂
民愚激則生事開誠撫諭卽貼然吳志

戴經字孟常祐子成化丙午舉人歷延平九江二府推官
居官執法甘淡泊六年獨處不以家累自隨遷泰安知
州致仕杜門著書有潯陽餘稿雙湖集行世秀水前未

有志自經始

秀水李志

朱綬字文佩成化丁未進士授庶吉士國史檢討侍岐王講讀遷楚府長史尋改晉府時王年耄世子世孫薨有欲竊柄者幽王曾孫於別宮而自請權國綬密疏以聞得救止以憂去楚王請復相優詔進階先後藩府二十

餘年方正不阿

秀水任志參徵獻錄

王朴字德純性孝友日記行事以自檢成化中以貢授廣東徐聞知縣有珠池課中官為民患請罷又有檳榔稅佐縣官廚傳朴首革之著為令創設社學教民鑿渠溉田去之日獄無淹滯民肖像以祀

浙江通志參徵獻錄

范璿字朝珍宏治庚戌進士授德平知縣潔己愛人治行

第一內召去任僅餘俸二金尋以病卒歷官十五年不

克葬關中彭澤分巡嘉湖重其清德為治兆域要郡中

士大夫會葬舟車塞途人以為廉吏之報

劉志參秀水任志

陶煦字時和弟照字時明曾祖鉦見孝義傳煦照皆受業於伯兄熙宏治己酉同舉鄉試明年亦同登進士煦知永豐調溧水入為湖廣道御史出知安慶府性寬靜喜怒不形守禦流賊民賴以安遷廣西副使改福建卒照授刑部主事錄囚蘇松地接故鄉或援姻婭賓客照一執以法以南刑部員外出為廣東僉事時大盜時大盜

唐大髯起惠潮梁閩琛起清遠察土兵陳時亮有才識授以進止逮捕悉定遷四川參議又值藍鄙作亂全蜀驚擾新都故無城促築之甫畢寇不克攻而去調威茂兵備副使為鎮臣所擠引疾歸起河南參政監小灘漕兌調劑出納公私兼裕遷雲南右布政使平嶧峨大盜調左四川丁憂歸

陳諮字汝謀父禧天順中以鄉貢授常德府教授歷瑞州府同知諮宏治丙辰進士選庶吉士改吏科給事上言國家承平日久民不知兵請敕兩京并天下諸司廣詢博訪或世胄官兵或草澤民庶有諳曉韜略通識戰

陣便習弓馬膂力過人堪為將領者上之兵部考其技能籌策可用者奏留京營操練其次分送邊方効用從之有東溪稿子澣嘉靖甲午舉人授廉州府同知改延平再改吉安有言言草求志齋詩集以上徵獻錄

陶儼字時莊正德甲戌進士授陽信知縣遭流賊焚劫請上官以羨金償民逋負民賴存活擢雲南道御史武廟南巡同舒芬林大輅等一百七十七人上書極諫下獄已復官世廟立議大禮不合黜知太平府調揚州所至有聲遷河南副使致仕卒之日屬其子置義田贍族徵獻

錄參秀
水任志

張徽字德卿正德辛巳進士授大理評事時有妻搯夫吭垂絕者妾救之得不死妻憤自盡坐妾死徽曰妾救夫非殺妻也出之一少年亂隣婦母切責絕不與通婦恚恨死抵少年罪徽曰致死不以奸法安得死亦釋之以議大禮予廷杖尋復官累進寺正擢知南雄府墾荒田釋流民開商市清軍屯多著惠政以不能浮沉取容罷免沒祀鄉賢祠

劉志參 徽獻錄

諸偁字揚伯祖忠為梧州守父敦隱居教授偁幼失學羈州猶逐羣兒嬉於市有僧明欽勸敦曰我相郎君必貴顯可讀書敦乃授之業偁天資穎異為文鈞深抉奧不輕下筆正德丁丑進士授黃梅縣縣素號難治一意撫綏抑豪狡使不妨民民大悅丁憂起補大名縣興學勸農脩舉廢墮孜孜不倦兩為令不攜家清約如寒素轉刑部主事歷陞貴州按察副使偁坦夷不設城府角巾綈衣人無不可近而性嚴一介有請謁必拂然見于色歷官二十年垂橐而歸同年夏言頗愛重偁當柄政未嘗通一札也子夏甘貧樂道嫻詩文書宗褚氏法孫錕博士克傳清白

樵李往哲傳 參徵獻錄

金榜字文華父粟諸生榜少孤哀毀如成人嘉靖壬午舉人知甯都縣歲大旱疫虎白晝食人榜禱境內諸山得

澍雨病者起虎亦遯去邑有隱糧榜欲清其額下令丈田豪家以為不便上官尼之調知連城與甯都接壤田畝糾錯亦如之欲遂前事奸民譁然榜憤乞歸遂不復出後有梁以衡者來知連城取榜所議田役者讀之曰不如此不足以定此邑之賦乃力行之民為樹金梁德

政碑 徵獻錄

吳鵬字萬里嘉靖癸未進士由工部主事歷官雲南副使遷福建參議洞民陳日暉叛親冒矢石擒之尋以右副都御史巡撫江西訛言起居民逃竄廉其人磔諸市民悉定塞上多警部議欲捐江西兵食充邊餉力持得廢

再遷兵部侍郎督理漕河值師尚詔反陷歸德擒梟將王千劬等賊宵遁斬獲無算晉工部尚書轉吏部時墨相柄國侵部權廢置多出其手鵬不能無牽制然瑕瑜自不相掩云 浙江通志 參徵獻錄

曾雨字文霖父春以文學稱兄丙南靖教諭攝縣事士民戴之雨嘉靖乙酉舉人知滕縣縣當孔道值流賊殘破旱蝗相仍縣西南瀕河沙漲數十頃給貧民墾闢以課償逋稅民得甦息流移歸業者數千奉檄濬三泉灣疏昭陽湖及溝渠以通運道疾乞閒改汀州教授學使以瀕海甯化乏科目才選王希旦等就雨學永定患盜令

攝縣事遣秀才劉榮說降之薦國子監助教

徵獻錄

沈銓字大衡嘉靖乙酉舉人授永年縣遷磁州政尚體要不事煩苛終德王府右長史從弟鑿字大新乙未進士授興化府推官廉平不苛巡按行部有疑獄輒以屬鑿援据刑書不妄附會攝莆田知縣海決為田患堅築石堤以禦陞南工部虞衡司主事權稅蕪湖令商自籍其稅即以其籍上之胥吏不能為奸知興化延平兩府省坊里供應積其餘以贍驛傳軍餉必親給之又革舟梁之稅陞江西按察副使備兵饒州卒于官

秀水李志參徵獻錄

賈名儒字實齋嘉靖丙戌進士歷刑部郎中時吏部尚書

汪鉉黷貨考功吏受賕事發訊之附重比忤鉉出知姚

安府補汝甯會世廟躬謁顯陵道南陽吏斂民貲供應

名儒為榜還給民遷密雲兵備副使年四十乞休又四

十而卒

徵獻錄參實山集

屠應竣字文升父勲官尚書謚康僖詳平湖列傳應竣始

徙居郡城嘉靖丙戌進士授庶吉士以不附張孚敬改

刑部主事值秋決已三覆審復上疏請緩死如所請典

試江西閣臣有屬其二子者應竣惡之既行夢人以酖

進覆之地地墳覺而嘆曰神告我矣受私如受酖也是

科稱得士調禮部歷郎中與同僚田汝成王慎中李義

壯各負雋名以古文詞相砥礪改脩撰進諭德移病歸其為文善比事屬辭陳義類情漁獵經史詩汎濫諸家無定格有蘭暉堂集

徵獻錄
參劉志

沈謐字靖夫父復有厚德謐為諸生即慨然慕道一日讀陽明傳習錄有悟即擬渡江從之游會陽明征思田不果聞湛甘泉薛中離講學京師遂就正之相與闡性命旨嘉靖己丑成進士授行人遷刑科給事中條上四事一重輔臣之選二表理學之臣三重風紀之任四均東南之賦表理學者請以吳與弼胡居仁陳獻章王守仁下禮部議謐從祀也劾罷自宮男子二千餘人又專疏

糾輔臣張孚敬怙勢不法出為山東僉事乞養歸母憂服闋起江西僉事備兵大庾平李文彪之亂假歸進湖廣參議未赴而卒謐內行醇篤畫地而蹈不失尺寸嘗建書院於文湖祀陽明湖在秀水縣北四十里與錢德洪王畿唐樞諸人往復切磋學者翕然嚮風稱石山先生入鄉賢祠有石雲家藏集

分省人物考
參徵獻錄

陶謨字宗顯儼子嘉靖壬辰進士授建德縣調莆田盛暑郊行吏卒進瓜果不食曰吾性頗耐暑按部宿村家村民爭治供帳召里胥曰民暴露處田間乃令具幃幔我臥能安乎終謨任無追呼之患擢四川道御史與給事

中王繼宗蘇應文條上備邊十二事引疾歸起廣西御史巡按江西贛州盜起設方略擒之遷大理左丞歸遵父命廣置義田贍族子九韶字舜卿號葵石嘉靖戊午舉人巢縣知縣不樂吏治挂冠歸

郁蘭字文芳嘉靖甲午舉人屢蹶公車姻家吳太宰鵬謂曰貂裘敝矣盍及我而謁選蘭謝不從及鵬罷歸始就選得績溪令裁諸供億持法公平不肯媵阿上官某官希執政旨將籍沒胡宗憲家郡守以屬蘭蘭曰司馬有功東南奈何欲文致之吾官可去法不可枉也遷南刑部主事尋乞終養家居絕跡公府以澹泊終

以上秀水李志參徵

錄

范之箴字從教瑄孫嘉靖乙未進士授行人陞工部郎中出知永州府時猺賊內訌官軍屢潰之箴計擒之兵備潘某欲張大其事以為己功株連無辜上其名將戮之之箴謁潘給之曰土寇跳梁律無貸但人言洶洶不開釋一二恐為頑梗藉口曷付之箴核實始寘法許之遂盡釋焉潘大怒以為賣已疏劾之箴上察知狀罷潘調之箴知漢陽永州父老立祠祀進雲南按察使致仕卜大同字吉夫其先獲嘉人元至正間有官三者贅嘉興楊壽六家居蕭陳湖明宣德間分縣遂為秀水人自官

三至大同凡八世頗為德于鄉里大同性孝居親喪三年不入闈嘉靖戊戌進士授刑部主事歷湖廣按察使僉事按行徭俗去民疾苦飭封守慎保甲期年羣盜屏息會海寇挾倭作難而閩為禍首推大同才擢福建巡海副使諸所興革咸與民宜賊知有備終其任三年弗敢犯著有征苗圖記備倭圖記

以上浙江通志參徵獻錄

吳淞字秀東嘉靖丙午舉人知靖州撫戢苗獠使同編戶輸稅會山水驟漲民多溺死亟懸賞格拯一人者與十緡又置筏濟未渡者州人德之佐郡九江時湖口關值水衝商舶多壞曰甯算錐刀而傷民命乎請觀風使者

議除之遷福建鹽運使同知乞歸子熙亮字欽吾由明

經授鉛山令擢梧州同知廉靜不苛撫孤姪甚摯陸欽

明志墓稱其孝友出處無間

浙江通志參吳志秀水任志

卜大有字謙夫嘉靖丁未進士知無錫縣剔蠹搜奸執法不撓中時忌調簡潛山嚴明益著宿奸畏服入為南工部主事歷禮部精膳司郎中知尋甸州有監泉詩稿經史集要弟大順字達夫癸丑進士知當塗縣縣富商大賈多規免役籍病細民為釐革之擢刑部主事凡歷四司進吏部稽勲郎中勾稽故籍吏弗敢罔有簠泉集大觀字中夫號盪泉大同弟大有大順兄也伯叔季皆第

進士而仲獨不偶入貲為蜀藩典寶四人友恭無間言大有子曰謀字子嘉以貢生授清流縣居官廉介緩催科邑人安之忤上官歸孫兆龍諸生有才名

徵獻錄參
潛山當塗

縣志

周恂字季實嘉靖丁未進士知樂平縣苞苴屏絕訟簡刑清俗好鬪至是遵約束無敢肆去官父老餽金不受進職方主事監督朝門工勞瘁卒囊篋蕭然士大夫助金以殮女不能嫁郡守資之奩具後有御史龐尙鵬按

郡脩其墓

徵獻錄參
浙江通志

屠仲律字宗豫應埈子嘉靖甲辰進士授弋陽知縣寬賦

省役瘠土之民賴之擢南京湖廣道御史時倭寇大訖上言禦倭五事一絕亂源二防海口三責守令四議調發五作勇敢又言禦倭諸將不善用兵之弊有九又論倭寇充斥軍餉不足其耗破之端有六皆下部議行出知廬州府軍興浩繁更值景府之國郡邑騷然仲律一意節省費減他郡十五歲大裨民多逋稅出贖鍰代償平糶積穀十萬全活甚眾以勞卒於官葛麟字後川與仲律同領庚子鄉薦知含山縣築城經畫有方而民不擾終吉安府同知

秀水李志
參徵獻錄

湯日新字懋昭嘉靖庚戌進士髫年銳志於學文章爾雅

所至執經問業戶屢常滿知分宜縣有惠政民立祠祀之累陞兵科都給事中多所建畫以通政致仕

秀水任志

姚宏謨字繼文祖漢襄城訓導遷葉縣教諭父應科宏謨嘉靖癸丑進士授編脩左遷六安州判越二年進揚州府推官在六安直指使者有所恃待宏謨倨甚及宏謨為推官而直指謫處屬下宏謨接之彌恭累遷湖南副使提督學政所拔皆鴻雋士重脩南嶽志楚南士子即嶽麓祠祀焉進國子祭酒未赴而母李沒先是漢在襄城為應科娶於李生宏謨甫二月而應科卒漢乃遣李歸母家宏謨自襁褓育於祖母會

縣志作徐

稍長每念母輒

跣地狂叫如不欲生既仕乃解官溯淮步訪襄城之李母在相持慟哭迎以歸至是乃請假歸廬於墓者三年歷陞吏部左侍郎兼侍讀學士以疾乞休卒贈禮部尚書著有寶綸閣集

徵獻錄參袁志

呂程字宗洛呂穆字宗文從兄弟也並原曾孫同中嘉靖癸卯舉人復同中癸丑進士程授懷慶府推官不樂親簿書棄官歸授徒以老時稱南川先生穆知邳州丁憂起補壽州有蕭姓者虧國儲欲賣女以納穆憫焉為代輸之擢工部員外郎督建三殿工出監琉璃廠工竣賜金進階嚴嵩用事引退穆少學於武進唐順之悉得其

傳晚歲著書講學士多遠來師之子懌祖彭山縣丞

徵獻

錄參
吳志

盛周字文郁元提舉轅八世孫所居梅湖有朱張氏稅暑亭遺址給事沈謐構書院講學其中周相與提倡從游者日衆周年四十三中嘉靖壬子舉人連捷進士知浦城縣請託餽遺一無所受時以暇課士闡性命之旨坑場寇起築柵守禦以奇兵擣其穴悉就擒嘗懲富豪某甲不法建甯守某潛為入賄求解弗聽乃以危言挾持之卒不動論戍上官以周強直不汙交章薦入都尚書趙文華諷周曰東樓虛臺省以待盍往過之謝曰士所

以望臺省者上思匡君下思利民耳今先以身乞憐相

府異日何以自立補南刑部主事歷郎中出知東昌府

郡故南北要津輓漕乘傳疲於支給請撥濟充協辦著

為令以勞卒于官著滴露堂稿南曹唱和集

袁志

錢同文字大行嘉靖癸丑進士弱不勝衣而志氣矯然特

立初聘婁人女鄉薦後其家願易婚同文怫然不允知

祁門縣每聽訟了無聲色藹然數語剖決無不當者褒

節行禁博徒事事詳覈倭寇傍邑偵知守禦嚴不敢犯

累遷知萊州府

鍾一元字太初嘉靖癸丑進士性介直有吏才知福甯州

鹽賈專利病民却餽力扼之州界山海間值倭警預拓外城為保障甫竣工而寇至丁內艱州人涕泣挽留墨縑禦敵民為立石紀績像而祠焉調池州移守甯國嚴明有惠政轉四川副使乞養祖母歸結廬郭外有泉石之勝以上秀水任志參徵獻錄

張鳳來字禺山嘉靖丙辰進士歷刑部郎中出知德安府歲饑值景府之國多方調劑民以不擾尋遷九江兵備改福建巡海副使駐漳南時月港寇張維等初授首瘡痍未平加意休息廣寇洋盜並起夙夜籌方略踰年得平吏卒不輕遣月下郡縣牒不過二三里甲供應幃帳

器用七箸細物悉簿籍之臨去給還改江西右參政進

按察使忤撫臣歸袁志參徵獻錄

黃錄字崇文祖盛成化丁酉舉人官禮部司務錄少孤母張撫而教之嘉靖丙辰進士歷兵部武選郎中出知安慶府歲祲既發廩復請蠲被災田租之半得允皖故腴沃大豪多詭畝稅以累貧氓錄令各邑悉按國初故籍復之遷湖廣按察副使以安慶事註誤左調貴州歸杜門不與人事性節儉嘗誡子曰人不大節者不大廉不薄享者不厚餘人以為名言劉志袁志參徵獻錄

王愛字體仁樸子嘗從唐一庵遊相與印證務求實踐動

有規矩尺寸不敢踰越年踰五十登嘉靖己未進士就
 教順天與諸生日夕講究嘗曰學以自檢檢人則隘學
 以容人自容則怠遷國子丞擢刑部主事有藉時相庇
 譁飲禁中逮治不少貸尋歸絕意仕進性無城府遇之
 如坐春風中角巾散步疎髯廣額望之如神仙病劇神
 色不亂咏黃鶴詩而逝

分省人物志
參儒林錄

沈啟原字道初謚子嘉靖己未進士素以資雄鄉里甲寅
 乙卯間倭警日迫公費不給出千金佐之又簡販徒有
 力者給重食使不為盜造飛舸于蕩教之習水戰以保
 鄉村倭不敢犯啟原登第名在二甲十七故事第十七

名為選首得北部前一人挾分宜勢奪之選司持不可
 卒並授南曹仕至陝西關南道副使林居嘗手一編雖
 醫藥卜筮之書靡不探討著麟經考鷄園近草四卷巢
 雲館詩紀星卦論等書藏經籍甚富有存石草堂書目

十卷 徵獻錄
參劉志

張應治字體徵嘉靖壬戌進士授行人擢南戶科給事請
 正宮闈劾遣巨璫邢保疏革南司禮監神帛出知九江
 府明初重地各存額糧萬石後撤去應治請還其半詔
 許焉江右大祲流民相攜入境以便宜發廩賑之全活
 無算陞臨清副使有奏議四卷

浙江通志
參徵獻錄

王錫命字天宇嘉靖壬戌進士歷兵部員外福建河南僉
 事改江西右參議年三十六乞養歸性恬淡不樂仕進
 杜門觀書三十餘年太倉王錫爵為志墓稱其賢徵獻錄
 項篤壽字子長幼警敏鄭曉見而奇之妻以女嘉靖壬戌
 進士授主事以母老改南歷考功郎中丁母憂起北車
 駕調職方張居正建馬市之議篤壽論不協又數裁抑
 權帥邊餉益拂其意出為廣東參議引疾歸居正歿客
 有論江陵者不置一辭人服其量篤壽友於兄弟其學
 以曉為始博綜今古通達國體惜未究其用著有今獻
 備遺等編二子德楨夢原哀其章疏名曰小司馬奏草

以別襄毅

徵獻錄參劉志

沈元華字瑞伯嘉靖壬戌進士仕至大理卿先是為禮曹
 時使朝鮮贈以金絲帳却之穆廟遣使市紅玉上疏極
 諫永順土司彭某與保靖大司某疏請開礦駁回得寢
 以乞養歸嗜學不治生產凡天文地理靡弗綜考古
 今方輿形勝要害製圖系說為人謙厚口不作雌黃著
 有竹葉軒稿浙江通志參徵獻錄樵李詩繫
 戚元佐字希仲兄元輔字希周嘉靖癸丑進士官撫州教
 授以春秋名家元佐自少與兄齊名壬戌進士歷禮部
 郎中明制宗室優祿秩而不令入仕籍藩府子孫自宗

尉以下不得出城郭不許輒越關津行賈其後支派繁
 衍廩祿不贍而格於祖制束手坐困流弊至不可言元
 佐上疏議變其制各藩不必盡授封爵士農工商各從
 其便弛出城赴關之禁使人人得力業謀生庶皇上親
 親之誼亦可以善其後議格不行陞尚寶少卿改太常
 寺乞歸著青藜閣集樵李往哲編馮祭酒夢禎謂宗藩
 一疏深憂碩畫不減賈洛陽秀水李志參徵獻錄
 葉朝陽字文榮嘉靖乙丑進士清謹若書生遇事執法雖
 豪貴弗能奪知信陽州晉工部虞衡司郎中司鑄錢中
 貴人索例弗與治鐵冶歲有羨金毫不染指出知常德

府有劇盜張金者嘯聚洞庭乃以計殲其巨魁餘黨悉
 散陞廣東參政致仕劉志參浙江通志

范希雲府學生好習武騎射冠儕偶嘉靖甲寅倭入寇郡
 守遴材士以將兵希雲獨請往敗倭於當湖追及白馬
 堰接戰三晝夜力盡陷陣死年二十有六同時死事者
 又有沈應仕多膂力素以膽勇稱率鄉團兵數十人出
 北關與倭角手刃兩三人倭憤短兵斫其左臂猶力戰
 殺四人為支解死秀水任志參徵獻錄
 沈本深桃花里人高祖履善洪武中徵入史館不就本深
 沉毅任俠嘉靖中上平倭策倭寇桐鄉以兵截之戰沒

于新塍鎮之間松橋子文秀廬墓陽灣里後嗣遂居新

塍秀水任志

鍾庚陽字長卿隆慶戊戌進士授太平府推官定當塗縣
踐更法條安慶便宜事民甚賴之遷大理寺左評事歷
工部郎中出知鎮江府開渠溉田以廉謹聞忤江陵相
謫丹陽縣補知廣德州復陞刑部郎中著有書傳經意
焚餘稿等書子明鶴光祿寺署丞明麟貢士徵獻錄參吳志
夏久安字靖原隆慶庚午舉人由教諭歷遷興化府同知
民感其德乞為守上從之官二十六年囊無餘錢僦村
舍以居有北征南遊諸草徵獻錄

夏建寅隆慶庚午舉人知安溪縣廉明果斷不受私書強
之則曰偽耳終不發封公事行村落蔬食自隨不費民

間一錢浙江通志參福建通志

黃洪憲字懋中錦子嘉靖末文體猥濫洪憲為諸生獨刊
落枝葉根極名理隆慶元年有詔崇雅黜浮遂舉鄉試
第一辛未會試第二士風翕然一變為翰林應詔上言
欲正文體必先端士習因陳六條一曰去浮靡二曰止
奔競三曰明是非四曰禁佞諛五曰禁黨錮六曰禁清
談奉使朝鮮歸述其國都形勝曰輶軒錄上之主順天
鄉試拔首輔王錫爵子衡為解首羣議沸騰郎中高桂

首疏劾洪憲指斥鄭國望李鴻屠大壯等八人并及衡乃覆試衡才果優得白而大壯竟黜遷少詹事兼侍讀掌院事初洪憲以制藝受知江陵江陵敗或誣以逆洪憲喟然曰江陵誠驚顧其輔幼主功不當末減分宜耶因貽趙用賢書反覆馮河包荒之義遂與衆齟齬攻者四起不自安乞休歸洪憲爲文章宗匠在朝日四方奇士以文字贅者必樂爲獎借終以此被議後子承昊上書辨父冤贈禮部右侍郎著有碧山學士集等十餘種詳撰述門弟正憲字懋客有才不第著易象管窺十五

卷錄
徵獻

曹懋官字濬川萬厯丙子舉人授肥城教諭歷國子監助教陞刑部主事恤刑三晉多所平反擢郎中出爲潯州

知府以病歸

嘉興何志

朱儒字宗魯精醫藥萬厯初爲太醫院使上覽方書中奇藥及左右所進秘方問儒儒言諸藥多燥非至尊所宜懇懇陳不可狀乃止又嘗召儒切脉儒言病在肝腎宜寬平以養氣安靜以益精上首肯命記其語沈思孝廷杖下獄儒微服牽羊入視之氣垂絕儒坐地手剝潰肉盡割羊股貼其股而敷之進藥二丸沈得起張江陵察知之面詰儒儒直承不隱張亦莫能難也儒多隱德遇

貧病者潛置金藥中周其急後子國祚登進士第一臚唱日儒在朝班上指儒顧左右曰此老積德所致儒學術靡不旁通申時行誌其墓曰余與君言每竟日不厭色温而氣和恂恂如也視其息深深如也時或稱引典故衡事當否揚扝當世事婉而曲中益知君蘊抱蓋古有道者贈少保武英殿大學士

劉志吳志參家傳墓誌銘

馮夢禎字開之一字具區萬厯丁丑舉南宮第一官編脩與沈懋學屠隆以文章氣節相助張江陵奪情諷以不可忤之外謫廣德州判遷南司業厯祭酒頗以聖賢之道激礪諸生會部郎市撻成均生疏論罰之諸曹側目

誣劾免歸遂不復出夢禎落落世外少仕態嘗與布衣野衲嘯傲湖山稽討典籍丹黃滿几好獎引後學凡以藝質者片語有合輒推許恐後一時秀雋風靡後之升沈得失曠然不繫於懷也詩文疎朗通脫不事刻鏤有

快雪堂集

分省人物考參徵獻錄秀水任志

黃正色初名遵憲字懋端綜子萬厯丁丑進士授中書考選南山東道御史出按廣東時妖人王子龍已誅粵有同姓名者監司欲得以媚上官謂前所獲非是而以其人傳會之正色與知府孫光啟力爭得寢陞漳南道副使論調歸長子承乾字履謐癸丑進士官鳳陽推官除

土豪劉澤遠三掣兩淮鹽課以廉最擢兵科給事中徵

錄參秀
水李志

屠叔方字宗直應峻子萬厯丁丑進士知宿松縣調繁鄱陽行取補廣東道御史巡按甘肅應天江西皆有能聲先是革除時遜國諸臣所屬一丁一地分戍劇邊一遇絕丁輒行勾補鄱陽胡閏為大理寺少卿殉難全家被慘戮叔方知鄱適有符勾胡閏絕丁憤然曰彼死忠何罪其親屬又何罪使我有言責必爭之擢御史即上疏言革除諸臣凡被戮永戍及親屬連逮謫充軍衛者乞一體赦宥矜錄子孫脩祠祀以慰忠魂從之一時蒙宥者千六百餘人京師張赦榜時大風忽起榜飛半天轉輾久之仍墮故所鄱陽張榜亦然無錫顧憲成為作英風紀異錄外轉山東副使論降歸著建文朝野彙編載革除事甚詳徵獻錄參
檇李詩繫

沈自邠字茂仁啟原子萬厯丁丑進士官檢討與修大明會典成遷修撰省親歸卒年三十有六自邠性孝友恬靜雖素封早達退然不異寒畯無疾言遽色與人交和而不隨為文辭援筆立就不事搜討而精意疊疊深中尺度不克永年士論惜之秀水李志參馮
夢禎具區集

張應宿字經野萬厯壬午舉人授欽州知州時交趾莫登

庸叛服不常扶祿富甯者握國柄窺伺而欽之江水通
交趾揚帆瞬息可至應宿爲城隍樓櫓之備甚嚴又條
防禦計上撫按同知某以應宿虛張賊勢妄希冒功劾
罷未踰年寇至州城失守巡按御史李應魁劾某阻應
宿之策致債事應宿始得起用祀于欽著守欽蠡見樗

里子集

徵獻錄
參吳志

朱國祚字兆隆儒子萬曆癸未廷試第一授修撰因災異
請罷開礦撤稅使不報湖廣稅監陳奉橫甚貽書巡撫
曹楷發其狀上怒幾逮楷奉亦因此罷去累擢禮部侍
郎攝部事時皇長子儲位未定冠昏逾期國祚屢疏諫

戚臣鄭國泰希賢妃旨先冠昏後冊立國祚抗言本朝
外戚不得與政冊立大典非國泰所宜言請先冊立後
冠昏因名制分因分制禮不失其序也又言冊立初謂
小臣激聒故遲之後羣臣勿言則曰待嫡及中宮久無
所出則曰皇長子體弱須其強今又待兩宮落成矣自
三殿災朝廷大政令率御文華殿三禮之行在殿不在
宮又言太祖仁宗卽位初卽建儲貳宣宗英宗冊爲皇
太子止二歲憲宗孝宗止六歲陛下亦以六歲未聞年
十九而不冊立者國祚攝部事二年爭國本疏至數十
上一夕遣中使召國祚急至則傳諭冊立時倉卒得旨

廷臣猶恐稽典需時或致中變國祚預定儀注以待翼日卽上之儲位卒定改吏部侍郎引疾歸光宗卽位起南禮部尙書命入東閣加太子太保進文淵閣時與劉一燝葉向高同心輔政先是鄒元標侍經筵而躓及廷推都御史上疑其衰老國祚曰元標在先朝直言受杖故不勝久立其人老成端恪堪大任上爲動容允之給事朱欽相倪思輝御史王心一劾客氏逮治幾不測以國祚言得免充會試總裁倪元璐盧象昇黃道周吳麟徵徐石麒張國維等皆其所得士改戶部兼武英殿大學士魏忠賢漸干政嘗導上內操國祚密陳其害忠賢

深憚之刑部尙書王紀爲忠賢所逐國祚嘆曰去一大臣如小吏國事不可爲矣遂請告十三疏始允明年卒贈太傅謚文恪有介石齋集同縣陸觀德字紹泉嘉靖甲子舉人歷遷饒州知府曾充壬午順天鄉試同考官

國祚出其門人謂有知人鑒

明史本傳參徵獻錄

姚思仁字善長萬曆癸未進士授行人遷江西道御史出視長蘆鹽課有吳天賞者領南兵三千人防禦天津侵蝕兵糧衆揭天賞于竿將叢射之思仁亟諭止借鹽課以給遂帖然世宗朝薊州人李昇嵩縣人刁騰言開礦之利乃分遣中璫崔閔等相視而衛東軍李賢復言遼

東之礦卽命賢爲礦長至神宗朝中人四出害民甚酷河南開採民死者相枕籍思仁巡按其地上疏力爭陳八大可慮不報乃復繪開礦圖二十四幅圖著一說極言其害上爲動容輟役入掌河南道畿南大禱上疏請米三十萬賑飢陞工部尙書加太子太保致仕年九十卒著有律例解京兆政略救荒全書五經疏註醫方考等書子以亮字漢臣知貴州都勻府事以亨有傳徵獻錄

盛萬年字伯恭周孫萬歷癸未進士授刑部主事歷遷廣東參政分守嶺西倭寇吳川邑故濱海奸徒勾倭登陸焚劫萬年購義勇配狼兵出戰賊遁倭大舉寇雷州萬年在高州聞報曰高雷相去六百里陸往賊必知之非拒則遁從海道一日至出其不意必成擒矣乃料戰艦六十揚帆抵雷倭方踞民廬轟飲官軍從市口撤屋而焚之賊奔突不得出殲焉倭復寇廉州又命遊擊拒之俘馘五十沈其船倭不敢復至時增設右江監司萬年署賓州柳賓苦賊寇暴召土司黃文輝授方略搗其巢賓州平遷江賊桀驁難制萬年請調廣東兵二千東會於賓佐以本營分路深入俘斬二百餘悉招降柳州賊謂官軍急賓未暇及已萬年別檄土司各以計擒其渠

魁眾潰散遷江柳州俱平謀報賊眾數千將夜半渡江乃令移舟載火具夜往伺半渡擊之賊大潰自是遂無賊患遷江西按察使致仕子士元以蔭授中書舍人有議邊一疏莊烈帝稱之曾孫民譽進士徵獻錄

吳宏濟字汝楫萬曆丙戌進士由蒲圻知縣擢湖廣道御史連劾福建巡撫司汝濟大理卿吳定戎政侍郎郝杰薊遼總督顧養謙不納詔三王並封與同官抗疏爭御史吳之彥之子鎮訐趙用賢悔姻事戶部郎鄭材楊應宿陰主鎮行人高攀龍為用賢訟於朝且語侵政府奉嚴旨廷訊宏濟與李世達安希范孫繼有譚一召等上

言攀龍為君子其論正應宿為小人其說邪不宜令人得志君子引身上怒貶二秩調外臺省交章訟之上益怒皆奪俸宏濟竟坐削籍歸天啟改元都御史鄒元標追論國本功贈光祿寺少卿明史安希范傳參徵獻錄

黃承元字履常洪憲子萬曆丙戌進士授工部都水司主事出理張秋河道時議濬泇河以濟運承元實經始焉歷湖廣山東江西湖南道參政脩梅林玉峽諸道均永新縣屯田徵額整萬安營軍規轉河南右布政使裁監兌官以息紛擾轉陝西左布政陝屬歲增稅額積至十萬緡大為民病承元請減額蠲逋以紓之入為應天府

尹歲旱米騰貴奏發京儲以救荒巡撫福建歸卒於家
贈工部左侍郎著盟鷗堂集北河紀略十四卷安平鎮
志十一卷河漕通考四十五卷

徵獻錄參
秀水任志

項德楨字廷堅萬曆丙戌進士授工部屯田主事疏爭三
王並封又與顧允成張納陞岳元聲等廷詰王錫爵有
直聲尋督易州山廠辛卯歲星現民間訛言司天奏易
州有王氣官兵來誅屠紛紛逃匿不可止長吏懼德楨
曰民方驚疑未易法繩乃治具張樂召客讌飲州人偵
知稍稍復業倭擾朝鮮且逼遼德楨撰北境禦倭議未
施用陞山東僉事備兵薊州石星惑沈惟敬言議封貢

倭長小西飛自山海關闖入德楨具疏力言其詐朝廷
始遣將禦倭皆德楨計也陞四川參議改補密雲德楨
長於兵法功在邊陲時謂其有襄毅風進河南副使兵
民詣闕乞留詔如所請武弁安本立恃政府私交恣橫
痛裁抑之為政府所銜尋轉山西參議引疾歸著續名
臣紀等編凡十有八種子鼎錠字孟璜選庶吉士有呼
桓日紀等編並詳撰述門

徵獻錄參沈
思孝墓誌

陶涵中字虛來父廷錦見孝義傳涵中萬曆戊子舉人知
安化縣調平江遷岳州府同知懶迎謁不愜于上官改
吉王府長史後改布政司參議著清酣集丁仕明庚子

舉人蘭溪無錫教諭遷知英德營造學宮捐俸數百緡

一以興教作人爲事卜二南字南仲癸卯舉人臨邑黃

陂教諭遷知臨桂兩舉鄉飲大賓工篆隸著雞肋集秀水

任志參
徵獻錄

項良枋字初輿五世祖序字克循績學砥行入太學歷均

陝沂三州守有政聲良枋萬曆戊子舉人知上高縣工

詩文有幽湖居士集永和集敖陽集芝水集徵獻錄

丁仕明庚子舉人蘭溪無錫教諭知英德營造學宮捐俸

數百緡一以興教作人爲事于志

卜二南字南仲癸卯舉人臨邑黃陂教諭遷知臨桂兩舉

鄉飲大賓工篆隸著雞肋集于志

陳懿典字孟常萬曆丙子以儒士應試擬元司臬以未入

黌序疑之直指輒然曰此卷豈當後人甯遲下科應不

失第一也旋補博士弟子已而已卯果領解壬辰成進

士官編修時神宗皇儲未建諭封三王抗疏祖訓無元

子並封之例又論宰臣依違遷就無匡救輔弼之策朝

論避之尋轉中允諭德冊封魯藩餽遺悉却以目眚假

歸葉向高薦懿典負經世之才宜大用詔起掌院學士

不就採輯肅顯兩朝有關脩齊之要者成聖政聖學四

卷上之書中指切宦官不得干政以寓規諫魏忠賢銜

之忠賢敗得免崇禎初晉少詹益遂初志里居三十餘年品誼清介書無所不觀著吏隱集論孟賈義就李往哲傳左陞紀略諸書嗣子泰甯諸生著尚書講義

浙江通志

參吳志

范應賓字光父曾祖璋見文苑傳父之京貢生講學得洛閩之傳策賑濟繕輿梁鄉里德之應賓萬厯壬辰進士知商城縣救荒有法又置學田以贍貧士以才調南宮懲惡撫良治為畿輔第一遷工部屯田司主事厯吏部郎中卒著有尚書壁業

袁志

陳德元字葆初萬厯戊戌進士授濟南推官擢禮部郎代

潘謀奪嫡部議兩可德元力持大義卒定冊立累擢廣西巡撫卒予祭葬子孟龍負文望

吳志

張南翀字海玥萬厯辛丑進士由縣令厯任福建知府居官廉謹歸田敝廬數椽無異寒素狷介之性至老彌篤終歲杜門惟元旦出拜鄉里而已

秀水任志

陳繼徵字允遠萬厯丁未進士授昌邑知縣值議開膠河役甚重力持不可調益都寬厚清靜約已愛民以勞卒於官子萬言義不受賻邑人哀送者塞於途

徵獻錄

陶朗先字元暉副使儼元孫萬厯丁未進士授南京都水司主事出知登州府時登萊青連歲饑而遼東大稔請

權弛海禁渡遼告糴三郡得濟在郡設書院厲人材置
贍士贍軍田各千畝募民開島田七千畝積穀本三十
餘萬石擢本省按察副使值遼左需餉急議開海運以
朗先備兵登萊從三犏牛陸運五百里抵遼甚艱乃募
人窮海島得水路直抵益州套凡三年饋遼一百八十
餘萬省陸運費二百餘萬少府錢五百餘萬會遼鎮乞
援青兵懼而譁劫郡守爲變朗先單騎往諭卽止遼陽
失守遼人渡海者數萬鎮臣欲拒之朗先不可令分屬
邑給曠土使耕其無家而獷悍者募爲兵時朝議三方
進取三方者廣甯爲正兵天津登萊爲奇兵熊經略廷

弼策也於時登萊設巡撫以朗先爲之朗先銳意規畫
三月得水陸師三萬馬萬匹戰艘二千餘火器甲仗二
百萬餘冀與廷弼戮力爲三方策應而遼撫王化貞故
異廷弼議互相訐奏化貞將毛文龍鎮江之捷實僨機
也中朝以爲奇功廷弼以爲奇禍適朗先亦疏劾文龍
因目爲熊黨李春煜者魏忠賢假子也與朗先舊有隙
高攀龍實與朗先善高劾崔呈秀罷職李因說崔曰高
之劾公陶陰使之也呈秀遂劾其忌文龍祖廷弼會廷
議有登萊水師無所用之語朗先於是疏乞散兵裁撫
節餉待時請退詔已許璫遂授意應撫王象恒密劾朗

先侵餉遂懸坐贓銀四十餘萬兩逮獄三日一比籍其家不及千金朗先欲置辨而廷弼亦在獄謂曰公休矣公事璫甯不知耶卽辨滅贓賊均耳公甯能輸耶均不能輸何多乎四十八萬也遂誣服璫又勒使噬楊左韓劉諸人受考掠股肉糜爛一夕被逼死入獄時登之人赴內外各衙門號呼營救者不知凡幾登兵願捐三月餉存其家璫旣誅子學瞻抱軍需各印冊叩閭始得免追學瞻崇禎己卯舉人次子學易未冠朗先死逮家屬奮然曰兄留報父讐弟拚此身殉此案也在獄十八年甫出墮江死季子學琦亦能文有節槩朗先康熙二十

六年祀鄉賢

明史袁志吳志登州府志參方震孺朱一是陶中丞傳

朱大啟字君輿國祚從子父國禎諸生事親孝博涉羣書爲文千百言立就大啟少國祚六歲幼同學並受國禎教萬厯庚戌進士授南昌推官縣役周正翫法橫於鄉重按之周益傭通益妻殺益夜遁遺犬於室大啟出犬銜隸衣驅不去命隨犬往于室中掘地得尸捕罪人至楚獲焉入爲吏部主事厯考功員外時吏垣與銓司比昵枉法大啟輒持不可進文選郎中逆璫方用事崔呈秀藉璫勢屢請託悉謝却求賢科吏列二十四人求缺云內十六人東廠命也叱不顧魏忠賢奏遣內臣分鎮

九邊吏部尙書王永光率九卿公疏廷爭大啟實具草忤璫意又以封忠賢弟姪魏良卿等議世襲大啟力爭之璫益恚幾陷不測遂因國祚葬事假歸忠賢遣緹騎偵之尾至淮安無稍隙乃去莊烈帝卽位擢太僕寺少卿督餉江右有旨額外搜括大啟言江右貧瘠正額不充安問額外得罷進大理卿歷刑部侍郎尙書馮英被斥自赴獄上命攝部事大啟上疏救英且辭署篆上不允辭令英歸私邸待罪旋以病告大啟自爲刑官清獄慎刑所全甚衆辯纍臣玉三重曹履泰之枉論釋都御史唐世濟巡撫錢士晉郎中劉廷諫等于獄三遇熱審

悉意平反每次釋三四十人臨去請以熱審法通行直

省著爲令至今仍之性孝旣老語及祿不逮親嗚咽流

涕歸里後惓惓國事卒贈刑部尙書祀鄉賢祠著有曼

寄軒集

浙江通志參袁志秀水任志

賀萬祚字孝延萬厯庚戌進士歷廣西布政司參政分守

左江道獲土寇胡扶記招降莫敬龍所部千人置之內

地別部帥扶黎三以兵出掠敬龍生擒以獻羣蠻懾服

鎮安土司岑繼祥與歸順土司岑大倫爲仇潛通安南

莫敬寬密以騎衆掩殺大倫劫官男州印去當時欲徵

功謀討安南萬祚曰鎮安世受冠帶一旦敢爲禍首舍

此不問問安南非計也宜治鎮安以漢法詰責安南聽其服罪當事從其言敬寬果輸服送還官男州印轉江西布政使分守嶺北道流賊方肆焚劫圍定安破安遠聞萬祚至悉引去萬祚所至輒以軍事顯盡瘁以死著大業齋文集以兄子侃脩爲嗣侃脩舉人卒亦無後

朱彝尊

尊祠堂碑參秀水李志

沈振龍字翼乾萬曆癸丑進士授泉州推官歷守贛州適閩寇流患虔撫議焚郭外民居閉城守振龍不可部里甲申斥埃寇聞有備不敢至時避難者雲集軍士輒縛上幕府指爲賊振龍按驗開釋以此忤上官意劾歸家

居睦族濟貧倡脩府學值歲饑募粟煮賑救死掩骸不遺餘力鄉人德之沒祀鄉賢祠

吳志參秀水任志

金麗兼字雙南萬曆丙辰進士授行人累陞吏部郎中與同榜魏給事大中黃御史尊素以名節相砥礪避璫燄乞假歸閉戶十載著焚香錄召補文選郎時溫體仁當國給事中李世祺疏劾之觸帝怒欲追譴世祺考選時掌選郎中孫必顯麗兼白尙書李長庚曰考選貪懦不職則堂司官均應連坐若能彈劾政府乃不負言職司官宜賞追處非祖宗法當執奏長庚曰如批鱗何能獨任其責則可麗兼遂自上言帝意解必顯得輕譴時科

貢監生入貲者得越次授職具疏革之帝御下嚴於銓
曹更甚山東按察使李天經以資深題加光祿少卿帝
以不合驟陞詰問且密令廠臣駱養性訪其有無餽遺
無所得仍貶三秩視事麗兼畏罪請養歸起南助教復
改文選移考功郎中卒於官尚書史可法請卹其清節
得旨優錄

黃承吳字履素萬曆丙辰進士官大理評事著律例折微
讀律參疑律例互考三書閱中外章奏遇烈婦悉作傳
贊曰闡幽錄進吏科給事中轉刑科魏大中被逮拷掠
追贓身無完膚承吳爲助納忠賢矯旨奪職崇禎初起
戶科右給事中首請用廢籍諸臣次請清覈經年增餉
又言西北多曠土請責有司開荒以足軍餉又言萬曆
間加派田糧瘠土偏受其害如桃源海州郟城尤甚請
減其額遴工科左給事中出爲河南鹽驛副使累遷湖
南參政分守南瑞病乞休著折肱漫錄梓薛已醫案薦
補九江道有安插蘄州梅廣間諸賊爲江南奸民勾引
將渡江承吳知賊黨多瑞昌人與瑞昌令趙三薦協擒
首惡張羽王信古等千餘人賊遂遁陞福建海防按察
司副使有平海寇功調廣東按察使開釋濫獄閱囚牘
雖病不輟卜築吳興之杼山自號樂白道人因以名其

集脩縣志及家乘又有閻齋吟稿若干卷以上徵獻錄

姚遲字士夫萬曆戊午舉人為德化令均屯租除胥蠹弭

盜清獄庭有藁木復生枝人以為惠政所感作瑞樹錄

紀之秀水任志

項夢原字希憲萬曆己未進士授刑部主事歷遷山西副

使備兵懷隆鎮鎮密邇京師又為陵寢肩背時方用武

而兵不滿三千夢原誓死就職至居庸關聞有鼓噪者

令探之答曰宣大援遼兵不肯行非我汎地夢原曰等

王事耳何分汎地為單騎往撫眾訴衣食不給夢原三

日措給之帖然就道插漢與敖目七慶毛乞炭兄弟合

眾數萬攻永甯且及延慶夢原率將士拒戰復召懷來

龍門各營兵與賊合戰數日賊大敗輿七慶尸遁事聞

以捷多傷亦多論降議者欲夢原陳辨夢原默然歸所

著詳撰述門徵獻錄

陸康稷字衷涵寄籍吳江萬曆己未進士知貴溪縣調廬

陵廉明善決疑獄有富民會某毆丐者羣丐取死人鼻

至會所康稷察屍不類丐訊之乃斲新棺誣會者置丐

於法以報最將去當編審為留三月悉心審定然後行

民甚戴之授武選主事忤璫勒罷起稽勲主事轉驗封

考功文選陞員外歸徵獻錄參江西通志

陸卿允字階卿父光岳以歲貢選廣信府教授卒於京卿
允奔喪扶櫬歸舟子欲棄同載十餘櫬爲理論且厚遺
之均得歸事母郭備孝養以貢歷四川烏蒙軍民府通
判值流寇焚掠解餉八千餘里無闕失招難民緝巨盜
斷疑獄督撫交章薦以病歸有雲起堂詩集子鎮鼎鴻
臚右丞

項桂芳號楚東忠四世孫貢生選韶州通判捕盜減權稅
招輯猺獠以清肅聞歸里後寄興詩酒與名流相酬唱
有歸來草諸集子玉筍貢生有文才著樵李往哲續編
爲景陵令清操惠政三楚稱循吏焉

以上吳志參
秀水任志

姚以亨字用嘉思仁子以蔭入太學授南中府都事轉太
僕丞遷南刑部主事歷郎中素熟法家言至是大獄委
臺者悉取決焉出知曲靖府雪論辟囚婦鄧氏冤平彝
白水二衛大水設法賑貸多所濟富紳繆某死二子爭
財進賂以亨置金於庭詰而導之兄弟愧悔遂息歸築
別業南野焚香誦禪以老所著詳撰述門子清字永伯
諸生性孝爲祖父上疏訟冤得追卹甲申後隱於頭陀
朱大競字君籲國祚子以任官太僕時虧馬價方逮問莊烈
魏黨梁夢環誣劾大競丞太僕時虧馬價方逮問莊烈
帝卽位訟冤補原官出知楚雄府絕供應民有獻菜果

者槩勿許時武弁倖功每掠蠻童焚婦之迷道者指爲
間諜鍛鍊上之郡廉其枉嚴禁之聞母訃貧不能歸巡
撫姜思睿督學邱名世爲治裝乃行百姓謠曰清貧太
守一世難百鳥有鳳凰有鸞弟大觀亦以任官南虞衡
司郎中出知思恩府太平推官某治獄好株連勾思恩
數十人大觀曰若輩皆貧民踉蹌行數百里是驅之殍
耳拒不遣卒於官

以上徵
獻錄

沈希仲字方壺國學生任江西推官以勤敏稱解宗室之
難出同官於獄撫字寬恤士民咸沐之喜汲引問業者
戶屢常滿性孝友澤及宗黨人稱長者有尙書印宗歸

與詠諸集

唐從悌字玉汝貢生以特用知翁源縣縣處萬山中地瘠
民頑從悌勤撫字革陋規擒妖黨釋疑獄民甚賴之陞

貴陽知州致仕

以上秀
水任志

邵德昭字明江歲貢生任朝陽令巡海禦寇邊境獲安天
啟初告歸士民勒碑紀績祀名宦同時金陽華字孟南
亦以貢生授含山令流寇犯境阻其道捕戮之擢兵部
主事子惟忠任廬州通判

吳
志

卜萬祺字戩甫天啟辛酉順天經魁舉人歷韶州守爲政
廉平稱治行第一初任刑部主事恤獄緩刑圜扉中靡

不頌其德事親以至孝聞秀水任志

仲聞韶天啟辛酉舉人授六合令歲旱力請上官移粟賑

濟又捐俸脩城主黍不擾於民民感之內擢致仕卒於

家吳志

沈繩芳字襲余天啟辛酉副榜選池州通判時沿江多盜

設法剿捕盜遂息歷署建德東流縣事以德化民清靜

不擾兩地立碑祠焉秀水任志

張龍德字鯤化應宿子天啟辛酉副榜為溧陽縣丞陞和

州同知值歲饑賑活萬人地濱大江盜歲劫往來船無

算設伏擒之殲其黨境以甯謐復條江防十二事上之

不報轉湖廣都司經歷罷歸乙酉城破死金花坊項氏

池亭僕從死者數人仲子錚負父尸殮於金明僧舍妻

侯氏投河死女適徐肇樑者亦自縊著有玉樹堂集

國朝乾隆四十一年奉

旨入忠義祠

欽定勝朝殉節諸臣錄參浙江通志嘉禾徵獻錄

沈耀辰字君房振龍子天啟丁卯副榜知三水縣首除冒

衿趙承勛等四境肅然催科立自限法革耗除弊不半

載歲額全完凡供應私稅陋習悉罷去海寇掠西南薄

城下拒走之又設法擒獲劇賊郭加正等賊黨戒不敢

犯擢廣州知府休官後道路梗塞不能行子瞻日冒險

赴粵奉親歸人稱其孝

吳志參秀水任志

項鼎鏞字于廷忠六世孫萬厯乙卯天啟甲子崇禎庚午三科武舉充南都撫標守備乙亥流寇逼陵寢應天巡撫張國維檄守安慶屢劾之追至宿松縣遇寇力戰死年三十八同時死事者蘇州衛指揮同知包文達吳淞守備朱士允把總張其威石電陳瑛等事聞贈鼎鏞參將賜祭蔭子勸錦衣衛小旗餘皆贈官有差建卹忠祠于吳縣演武場祀鼎鏞等一十五人又項禹揆字子昆縣學生明亡與如皋李之椿同遇害

徵獻錄參明詩綜

項聲國字枚公篤壽孫崇禎辛未進士授雅州知州布忱

惻厲風化州人作四清歌誦之旱步禱得雨歲大熟禾

有生六穗者

徵獻錄

濮有容

一作有宏

字德遠號居元分水籍秀水濮院鎮人崇禎

癸酉舉人知安陸縣流賊攻陷之一門十九人皆死難

國朝乾隆四十一年

賜諡節愍

欽定勝朝殉節諸臣錄參伊志

張晉徵字恭錫應治從孫受知於黃道周崇禎甲戌進士知閩縣勤撫字忤上官歸起補婺源遷刑部主事道周廷杖下獄力為調護無所諱歷員外出知建昌府流寇掠袁震鄰郡益藩徙樵川晉徵堅守擒賊首曾斗墟等

論功擢劍南道副使明亡歸

秀水任志
參徵獻錄

朱大定字君永國祚子蔭授中書舍人改判成都府張獻忠犯蜀以計斬其豪帥圍得解崇禎十三年冬間賊渡昭河人洶洶奔入城薪米驟貴蜀王及各司出錢易米粥難民大定夜歷諸廠周諮勞拊而察其踪跡可疑者別羈之俄而賊至大定與布政使侯安國守北門見城下一酋衣朱衣跨馬巡軍大定操強弩射之落其胄衆擁去謂安國曰賊多而未整可擊走也卽偕參將率壯士八十人出戰殺五人俘三人奪馬十匹入見巡按御史陳良謨提賊頭血纒漉堂上陳驚離席曰別駕貴公子乃能手殺賊耶是夜賊退屯柳溝浦大定請乘勢擊之不朝食提兵奮往斬二十餘級生擒七人賊捲營遁明年以功上攝重慶州民苦征斂下令曰我甯失官以去不忍困爾民也皆感激爭輸生母病假歸福王監國起尙寶卿上書督輔史可法請正君心收人望鋤姦佞慎名器足兵食通民情凡六事史動容歎曰救時才也將引用而馬士英阮大鍼輩驟柄政拂衣歸明年南都

亡死於錢塘

徵獻錄

朱茂暉字子莊國祚孫崇禎庚辰進士知宜春縣請除酒亭供應開釋矜疑罪四十餘人時軍需徵積逋急上官

令以新抵舊茂暲曰民一年止辦一年之糧官一任止
 盡一任之職力疏疾苦狀得緩徵賊陷長沙逼宜春
 軍將謀應賊茂暲選得好細宋子鳳斬之又誅大盜蔡
 全六等嬰城固守飛揭請援不得賊勢充斥不可支倉
 猝間天井窩盜復起遂失守茂暲冒矢石赴天津窩親
 擒盜首平其黨既被論罷總督袁繼威力請棄瑕錄用
 不報明亡卒年二十九

秀水任志參
袁州府志

吳鑄字鼎吾崇禎丁丑進士授廣信推官廣信界浙閩深
 林遂谷盤亘八百里為羣盜藪時盜已蹂躪五郡方會
 勦撫按知鑄才檄監軍事會陳子龍以紹興推官監浙

軍與鑄謀合攻破之又平鉛山峒寇撫按敘功上不報
 善折獄有夏言後裔及艾南英受誣事皆為之昭雪福
 王監國將擢諫垣馬士英尼之改禮部祠祭司主事南
 都亾累徵不起壽八十有五

吳志參朱辰
應吳禮部傳

戴長治字季脩少孤力學年十三試冠其曹崇禎癸未進
 士授程鄉令值流寇臨城親冒矢石捍禦招撫縣境以
 全論功進兵科給事中未赴歸家居二十年預知易簣
 期沒之日長子諸生樹聲慟哭嘔血三日卒

吳志參秀
水任志

朱茂時字子葵大啟子以蔭補順天通判攝宛平縣民有
 與璫爭田者直在民上官畏璫焰久不決茂時片言斷

嘉興府志 卷五十二
歸民莫敢抗歷工部員外提督張秋河道白魚臺縣至
天津衛凡一千六百餘里挑濬堵禦往來稽察不辭勞
瘁通濟閘以南五湖號水櫃舊制蓄水濟運而民盜種
湖田決湖隄積弊滋甚茂時履勘清查悉復舊大旱禱
龍神祠請神對坐烈日中自辰及酉得大雨漕渠水盈
五六尺人謂至誠所感時值用兵撥挑河夫爲張秋脩
城濬濠置義田義倉造鎗砲練民爲兵籌之三年孤城
賴以保出知貴陽府安酋餘黨未靖阿烏謎煽動諸夷
爲亂討平之定番州十六土司難繩以法知州趙德璋
入洞徵銀爲番司洪阿銀阿夜等所劫總督檄兵進勦

茂時止之遣一僧持手諭往陳利害且示以保全意阿
銀等感泣送趙出願歲納銀於府事遂寢茂時旣撫輯
流亡民漸復業乃以邊土少文學厚其廩給月課而季
試之拔十數人先後登科第以憂去黔人祀之歸田後
四舉鄉飲大賓壽至八十有九

徵獻錄

范奕文字正宣貢生授南都兵馬司居官清廉能平反疑
獄米脂盜寇長安奕文有討賊議當二不能用遂拂衣

歸著有墨兵堂集

秀水任志

張萬壽字來範少年卓犖負奇氣作文洞抉奧旨爲宣城
湯賓尹所稱三中副榜選涑州知州捐俸爲民償逋糧

嘉興府志 卷五十二
不足則廢家產補之又設法賑濟全活無數暇卽集諸
生講課文藝不倦擢甯州未赴遇變卒以次子天植貴
贈少司馬入鄉賢祠所著見撰述門吳志
夏祖訓字仲有歲貢生薦除雲南呈貢令地瘠薄民資水
利爲業沐藩莊兵雜處久恣侵奪立法禁之兵始不擾
土人吾必奎叛據楚雄土司沙定洲陰蓄異志沐藩檄
徵不赴祖訓撫馭多方德威並著沙感愧遣裨將詣謝
後復勒兵要請加銜不許襲破沐沐走楚雄相持年餘
呈貢要地祖訓勢孤力盡赴水死僕陸史二人殉
國朝乾隆四十一年

賜諡節愍

欽定勝朝殉節諸臣錄參浙江通志

項嘉謨字君禹初名定謨號祖洲高祖元沐見文苑傳嘉
謨國子生時流寇猖獗嘉謨以韜略薦歷薊遼守備尋
棄職歸乙酉城陷束其生平所著詩文於懷率二子翼
心及妾張氏投天星湖死著聽月樓詠史詩筠庵諸辨
有清居詩話木石居雜錄等書

國朝乾隆四十一年

賜諡節愍

欽定勝朝殉節諸臣錄參徵獻錄吳志

張翊字叔翰國子生素伉直乙酉城破戴巾衣襤衫端坐
觀書於廳遊兵入輒勸毋妄殺笑以去有悍卒至與語

嘉興府志 卷五十一
忤以刃斃之不屈遂見殺一門二十七人俱死其鄰秦

如泉等倉猝殮之殮畢皆自縊

自靖錄

葉森字公榮諸生事親孝課諸弟能盡其力乙酉

大兵下江南徽州武弁黃伯脩引兵追拒至嘉興民苦其擾

衆以森任事敢言推往諭之遂被害

吳志

高穎琦字章甫縣學生授徒講學乙酉城破或促之出走
穎琦曰讀聖賢書所學何事城亡與亡固其所也飲刃
而死妻徐氏呼三女前曰不可留以辱汝父手推之連
墮於井遂自投有僕周龍不忍去被殺一門死者十二

吳志參
人明史

張次柳字幼緒府學生子玉立縣學生乙酉城陷奮力巷
戰以死同時有湯成先字明甫與子一德並諸生王象
賢字懷和子諸生鯤字伯秀有文兩家父子各慷慨相
隨死湯之同學有吳業昌朱治恪相約死又有陳宮詹
懿典之嗣孫曰恂字不困曰慄字素心兄弟國子生皆
有文亦相隨死而次柳妻以縊死恂妻蔡赴水死鯤妾
張抱幼子蓮官投井死僕王茂從鯤死凡皆志節可愍
者

吳志參
自靖錄

周敬濂號慕椿武生當明末兵亂時隨都督陳梧舉義守
城敬濂分守西門城破戰死妻張氏匿簪井抱幼子忍

飢數日至螞蝗纏體而不知痛幼子在井啼哭恐人聽聞掩其口致氣塞而斃兵退始出卽有諷張氏改適者矢志不從以哭夫左目失明長子允達年十三遍覓父屍不得遂赴水以救得不死乃以衣冠葬父終身哀慟不已鄉人相傳周氏一門三義云子志

黃子錫字復仲幼穎悟張溥陳子龍咸器之乙酉充選貢第二當事將授以要職卒不及旣家居習弓矢劍戟以自勞子龍有所建白恒屬起草每中機宜壬寅益不自聊乃挈家入杼山課子及僮僕種瓜瓜實大如斗味甘遂以爲菜更以餘暇作畫人爭購之魏僖撰傳

邵璜字魯重崇禎壬午舉人知雲南大姚縣值寇亂闔門

殉難著有尙書說統新溪詩鈔小序

國朝

曹溶字潔躬號秋岳明進士爲御史嘗劾輔臣謝陞又能

開元參周延儒廷杖疏白其寃入

本朝以御史視學畿內歷戶部侍郎出爲廣東布政使左遷山西陽和道撫綏邊徼賑恤流亡民咸德之三藩叛從征福建丁母憂歸己未以博學鴻詞徵復薦脩明史因疾不赴以所輯崇禎疏抄五十輔臣傳上史館溶文章沈思湛鬱諸體雄駿尺牘小簡尤精詩源本漢魏有氣

骨與新城王士禎齊名晚號鉏菜翁築室金佗里日倦
圃蒔花種竹與知交置酒唱和其中嘗以明季門戶紛
爭是非失實著續獻徵錄六十卷輯學海類編至四百

餘種其他著作別見

吳志參攷
李詩繫

張天植字次先萬壽子兄天柱貢生著進善寶書天植順
治己丑進士授編脩是科第一甲第一人黃岡劉子壯
第二人鍾陵熊伯龍第三人即天植也文章聲價頡頏
兩鉅公出為河南學政歷大理卿兵部右侍郎天植宅
心溫厚居家值歲歉倡捐以賑濟為法司核議庶獄必
求可生之路全活多人視學力挽頽風釐積弊所著別

見藝文

吳志參
伊志

黃自起字隣直順治己丑進士授翰林改刑部主事念母
老歲一歸省擢郎中典山西試督湖南學政時長沙盜
賊初平自起曰治平之始當以禮樂為先宣揚文化勿
可緩也五月按部冒暑入山谷間受瘴瘴得疾卒貧不
能殮經略洪承疇賻之得歸櫬著有鶴渚堂詩集

吳志
參秀

水任
志

錢江字珥信順治己丑進士知瑞金縣有劇盜陳其綸許
勝可僧超忠據銅鉢山聚僧兵千餘江廉得超忠仇為
盜者檄營將勒兵討之佯諭超忠使助官兵擊賊信

以百餘騎來赴復遣人說超忠使偕數騎間道疾行來謁條畫賊情因伏兵中路縛之餘黨駭散閩賊劉方羅承俊等率衆附勝可嘯聚羅漢巖江請於虔撫大發兵勦之江誠其帥曰賊據絕險攻未易拔當長圍以困之帥如誠賊窘江察軍中與勝可有舊者遣往諭降勝可欲就撫而餘黨不服江語帥曰當乘其懈疾擊之遂潛師夜進擒勝可及閩賊十三人斬馘以千計師旋江豫策來歲師期密陳幕府乙未春虔撫出師聲言援漳實圖其綸遣別將將兵直趣縣境江會之進兵大柏山親部勒鄉勇攻其北赴漳之師轉而繞其南俘斬無算其

綸潰圍走獲於烏橋嶼三盜悉平歷官山東提學道改

陝西岷洮道

贛州府志
參新纂

項景襄字眉山秀水籍居錢塘順治壬辰進士由庶常歷官兵部右侍郎遇事持正敢言時比部欲改三流例減死者一家皆戍烏喇景襄謂大辟止其身若驅一家無罪置窮徼非法不可行力爭乃止先是海禁未開許濱海民以二百石船沿海捕魚東撫欲禁其篷桅景襄以二百石船非篷桅不行許其捕魚而禁其篷桅是餌而阱之也議得寢溫台有來京贖被掠子女者主者難之景襄曰此皆良民第驗有司文結宜卽遣卒

賜祭葬景襄淹通羣籍工書法

吳志

沈廷勸字子相拔貢知新甯縣兵燹後人民逃避城中僅十數家廷勸招來安集教以樹藝民漸歸附其後新甯裁併入梁山遂名其故縣為沈公村云補欒城縣遷商州以疾告撰身易實義一編歿祀鄉賢祠

浙江通志

屠洪基字濬之祖俊自浙東徙杭又徙秀水順治二年

王師南下洪基挾策干大帥帥奇之試署錢塘簿檄知上虞縣時浙東土寇充斥上官發巨盜五禁縣獄賊黨數千謀夜穴城劫之洪基諜知不待申報立梟五首懸樓櫓大書榜列炬火燭之賊駭遁八年知陽山賊馬寶擁數

萬眾至力拒守賊不克攻去次年復來攻堅守如前賊黨高必正率步騎萬餘乘城城陷被執不屈死乾隆五十七年

上諭追錄殉節後裔授恩騎尉世襲

吳志參廣東通志陽山縣志新纂

沈燝號星崖邑庠生遊幕貴州南籠府會逆苗滋事攻城太守邵廷銓適捐館民心悚懼燝具詞遣役縋城夜出乞援於撫軍并捐金募鄉勇為固守計身親登陴為飛礮傷額踣而復起經數月圍始解遂以創深而歿事聞

賜六品職銜

于志

李令聞字平叔順治四年隨征楚粵單騎降龍虎關歷任

零陵甯遠知縣值

大兵進勦令聞審釋俘獲無辜者數千人改知全州招徠西

延謠洞賑饑脩學宮卒于官

吳志參秀水任志

王雲字定遠順治己丑武進士初任廣東守備病痊投浙

江軍門進攻耿逆于仙霞嶺敘功補楓嶺營參將子法

字景汾康熙丙子武舉由守備歷江西銅鼓營游擊銅

鼓為盜藪法募敢死士伏莽待其來聚而殲旗盜以靖

軍民建祠祀焉

伊志

何元英字蕤音順治乙未進士授行人典試粵西遷督捕

主事時窩盜令嚴開宥甚眾進戶部郎中督理大通橋

糧務尋擢雲南道御史巡視河東鹽政先後多所建白

有南臺奏疏一編如請脩省論考察籌撤藩之事寬報

災之期除權關之弊陳里甲之累至於鹽法錢法剔蠹

釐奸凡有敷陳輒蒙

俞允通政參議以疾歸

吳志參南臺疏序

曾王孫字道扶父本姓孫氏贅於曾曾無後遂以王孫為

嗣王孫順治戊戌進士授漢中司理治獄多平反督脩

棧道二萬八千丈不辭勞勩改知都昌縣都昌民資新

建縣湖洲之草越境爭取構訟二百年王孫移文新建

先定草價令都昌民輸銀於縣解給之聽採草不禁訟

遂息厯陞部曹視學四川兵燹後加意恤士著有清風堂詩文集漢中都昌等錄

吳源起字準庵禮部鑄子順治辛丑進士授洛陽知縣時滇南告急豫有奸民乘機為亂源起密擒其首餘黨悉散洛陽賦重力請巡撫疏減之行取厯給事中值奉

詔舉博學宏詞源起慨然曰行誼本也辭章末也特疏以平湖

陸隴其薦疏言隴其理學入程朱之室文章兼韓柳之長會隴其丁憂未與試論者謂源起得以人事君之道尋告養歸年踰七十尚壯遊著五嶽遊記以上吳志

杜臻字肇余以進士選庶常厯內閣學士

國初遷沿海民于內地畫界而設之禁故界外多棄地而閩海流民蹙聚臺灣迨

王師收閩金門廈門以次列戍海濱竄匿餘黨相率來降安插未有計督臣姚啟聖請以界外地按籍給還并弛海禁收魚鹽之利給軍食疏下廷臣議持不可康熙二十二年臺灣平

上諭海孺弗靖權畫地以民遷茲反側永清界外田畝宜給還耕墾會給事中傅感丁請將江浙及粵東界外田一併招徠開墾於是別遣二臣往江浙而臻及內閣學士石柱往閩粵相度展界進臻工部尚書臻巡行自欽州之

防城始遵海以東歷府七州三縣二十九衛六所一十七巡檢司一十六臺城堡砦二十一給還民地二萬八千一百九十二頃復業丁口三萬一千三百定懸軍之營二十八而廣東之疆理以復又自福甯州西分水關始遵海以東歷府四州一縣二十四衛四所五巡檢司三關城鎮砦五十五給還民地二萬一千一十八頃復業丁口四萬八百定懸軍之營三十三而福建之疆理以復是役也臻往還嶺海跋涉三萬里勞來安集宣布皇仁諮諏民隱海澨山陬各得其所論者謂功益於南國云丁母憂起刑部尚書尋改兵部時議裁各省駐防及督撫

提鎮標兵額臻謂兵冗可裁而不可驟裁請自今有老弱病故出闕者槩弗補數歲額自減從之轉禮部尚書以疾告歸

上賜煙霞耆舊額以寵其行臻既卒康熙乙酉南巡追

賜額曰眷懷舊德臻少貧力學奉祖母暨父母盡孝好宏獎人材詩文剴切中條理所著詳撰述門通志參朱彝尊杜公疆理記

曹晉字受明拔貢任東平州同知詳革漕鹽陋規戴村大壩圯剋期鳩工築七十餘丈因上割地禦水之策廣植柳以護壩基至今賴之梁山盜為患上官委晉招復之

不戮一人引年歸樂善好施壽至九十有五吳志

張起文字卓人號緘齋少穎異年十三入泮卽食餼康熙

乙酉以五經舉孝廉補中書出知江西宜春縣以清慎

稱歸橐蕭然沒後遺稿散佚新溪詩鈔小序

卜陳彝字聲咳康熙甲辰進士知洛川縣值滇黔之變脩

堡砦練鄉勇有叛將李師膺朱龍以衆薄城下陳彝嬰

城守飛檄請鎮將楊某提兵至內外策應賊敗而遁尋

補武昌免派歸巴脚價及協濟大兵草束內陞歷吏禮

二部卒于官伊志

袁定遠字靜公康熙庚戌進士授新野縣累陞平度州歷

吏部文選郎陳豕宰廷敬深器重之保舉第一終順慶

知府伊志

李登瀛號叔遠歲貢知梓潼縣先是大司馬靳輔治河延

致幕府時河流橫決靳持開中河以避三百里波濤之

險爲永遠利登瀛實贊成之伊志

沈枚功字獻民父孚端方好義枚功能承先志以歲貢授

分水教諭陞任邱知縣興建義學闢治水田歲凶賑貸

全活甚衆民德之建感恩坊洎卒復祠祀焉伊志

張龍驤字標年康熙丁巳舉人知聊城縣縣有丈量舊尺

奸胥陰截短而誣民欺隱龍驤較舊尺正之歲饑民有

鬻妻女者給資令贖還之伊志

朱象鼎字禹州父麟世從征川幕署知夔州府再參浙幕時獲山賊黨讞上議屬族皆死麟世曰律稱謀反族誅者為期以上言也大功以下濫入非律意因奏得未減象鼎康熙戊午舉人知鄆都縣川東饑禁私糶于是川楚各屬皆遏糶民大困力請弛其禁遷通政經歷伊志朱彝尊字錫鬯國祚曾孫康熙己未以布衣舉博學鴻詞授檢討充明史纂脩官典江南試渡大江為文告於神矢拔真才還都魏尚書象樞朝衣造彝尊再拜曰吾非拜君也慶朝使之得人也

召入南書房供奉

賜禁中騎馬旋

賜居禁垣出入侍從而歲間異數頻仍旋被劾吏議當落職天子宥之鐫一級尋復原官歸里後

聖祖南巡進經義考易書二種

特賜研經博物額卒年八十一

高宗御製詩題經義考首

欽定四庫全書提要為核其著作實不愧一代詞宗所撰諸書詳撰述門子昆田字文益國學生少承家學又克自奮發力追古作者京師呼為小朱十嘉定張雲章謂昆田

詩上窺韓杜下汲蘇黃又稱其睥睨流俗踔躒古今幾

于父子之間各欲自成其不朽惜困于試年四十二先

彝尊卒所著笛漁小稿附父集以傳撫韻未梓伊志

徐嘉炎字勝力贈太僕世涪孫一日十行下誦三遍終身

不忘與松江夏存固嘉善錢不識警敏相頡頏有三神

童之日與從父善同庚同席研人稱大小阮康熙壬子

副榜戊午舉博學鴻詞授檢討充明史纂脩官典貴州

試歷侍讀學士與學士張廷瓚曹鑑倫史夔同直南

書房

召嘉炎至榻前問爾五經通鑑皆能成誦否嘉炎奏五經或可

背誦通鑑恐未能悉舉其詞隨問尚書咸有一德嘉炎

奏明書旨朗誦終篇後更端問宋元祐三黨諸人是非

嘉炎數對諸人姓名始末及先儒論斷優劣語

特賜御書臨蘇軾詩一卷是時詞臣未有

賜御書者拜

賜自嘉炎始尊陞內閣學士兼禮部侍郎充

三朝國史及會典一統志副總裁以疾告歸

賜御書直西清額及對聯詩幅嘉炎居家事母孝待昆弟羣從

以誠貧不自給典朝衣冬夏相易歲以為常伊志

沈廷文字原衡瞻日子京文弟京文學有根柢廷文師事

之康熙戊辰以進士第一人授修撰著有廣居文鈔北

征南歸等集

吳志

蔣鶴鳴字聲御出陸清獻公之門康熙癸酉舉人知舒城縣舒自明以來水利弗講故道淤塞田多旱乾鶴鳴相度原委部署經費方有成規適歲歉遂下令大興工使貧者受直以執役不三月濬河七十餘里人不勞而事速濟調江都救災恤貧慈惠一如舒鑄學宮樂器祭器件繫其勛兩著之籍越歲以勞卒

浙江通志參江都縣志

徐鳳池字梧岡康熙甲戌進士初任維容縣調永瀆清隱糧除私派脩城葺學舍以鋤強恤弱為治署象州一如

在永陞戶部主事遷刑部郎中擢浙江道御史巡視西城時差務需車輛有乘間橫索車戶者車戶皆逃散特疏發其奸因公事例止罰俸有傾之者竟落職歸及沒貧無以為葬其子大士在蘇州布政司鄂爾泰幕中以母病歸省中途聞母歿大士遽躍入水藉救得不死鄂公既資大士葬又重慕鳳池廉節為之立傳

鄂文端公傳

杜庭珠字詒穀尚書臻子康熙乙酉

南巡以太學生獻詩

命用心讀書日後進京効用益感激刻志厲學六年入都召見入武英殿纂修書館庭珠詩清雅書法道秀累試不得舉

纂脩期滿授臨縣知縣歲饑鄰境訛言有操陰符秘書者聚眾木壺臺山中將為亂時議發兵勦庭珠曰此必饑民蟻附耳力陳於大吏止之及遣人往偵則數百人相聚拾山果野蔬以為食訊秘書乃丐者歌詞耳調萬泉縣攝臨晉事時積逋重庭珠請分年帶徵觸上官怒委員督之急以民譁被劾歸伊志

張時泰字昇望號平山官廣西上林知縣有惠政著實嬾

齋集于志

范長發字廷舒以進士謁選南城縣縣經兵燹後民氣凋敝長發一意撫循免徵耗除派累歲借倉穀應時即發

使民受實惠而以平槩收之考最行取補禮部主事晉廣西道監察御史康熙六十年偕同官陶彝等以上疏獲罪蒙

恩以額外主事銜軍前効力隨都統圖臘赴征西將軍營歷天山涉推河還駐歸化城後

命赴察漢新營賦詩云書生慣戎服許國敢遲留又云餘孽期朝滅全師計日還可以見其忠悃矣尋以原職休致歸

卒伊志

石杰字裕昆以進士知清江縣繕廢堤以護城縣有淫祀曰天巫神火其像而弊俗革以才望內擢未赴丁父憂

尋以承審事誣連久始雪

世宗憲皇帝特召見以江南緊要缺用

賜墨刻貂皮香珠等物杰感奮歸而跪陳母前涕交下補泰州攝徐州丁母憂總督尹繼善以徐州河防值秋汛奏留
在任守制杰泣辭不得踰歲乃得歸終喪起邳州擢徐州府宿遷災舊例次貧不加賑杰破格請加不待報而發米二萬石竟得請擢建昌道檄勘松茂道屬頑番罪魁而釋其黨進勦占對逆首總理軍需移駐打箭爐又移駐章谷及仁連地方衝突烟瘴三千餘里以勞致疾擢四川按察司

命下而卒

伊志

汪繼燦字倬雲先世自徽州遷桐鄉至繼燦注秀水籍以舉人爲中書陞兵部員外授山西道御史巡視西城西城奸宄雜處有游手數輩藉端滋事噬陷平人繼燦悉繩以法不少貸豪強斂跡轉河南道巡視臺灣值漳泉米貴設法添運臺米萬石運內地米價頓平未滿任以

憂去

伊志

陳士鑛字山貢由貢生授中書厯工部郎中出守萊州捐俸賑饑改知鎮江府府當南北孔道往來乘傳絡繹士鑛調度悉宜與民無擾以疾卒於官

吳志

沈李楷字元禮康熙壬子舉人由慈谿遷秀水楷以庚辰

進士選庶常改廣元縣行取歷郎中出知饒州府十年

以儒術治郡苞苴請謁不至於庭其去也饒人祠之著

有詩文稿瑣譚景行錄似奕編子祖蔭祖脩並以詩鳴

祖蔭有古音齋集祖脩有古樵詩稿

伊志

項維聰字穎叔舉人知江都縣事丈岍江地以贏補絀豁

枯丁令隨出運辦核三汊河疏淺費商減金千餘民減

夫五萬歲著為令三年行取百姓以水一器鏡一圓送

王之

江都縣志

張仁浹字觀旂天植從孫以桐鄉籍中康熙庚子舉人性

肫篤務為義理根柢之學乾隆庚午

詔舉經學錢侍郎陳羣以仁浹薦年老未赴郡舉鄉飲酒禮推

仁浹為賓致仕郎中金作楫為俱禮成之日觀者皆動

容興感所輯周易集解增釋八十卷精採漢後迄今約

二百餘家以已所釋附焉精言奧論往往闡前人所未

發云

伊志

諸錦字襄七號草廬家寒微父有隱德錦生數歲孤母氏

為擇師日攜以就塾力鍼黹以供脯脩錦亦自發憤刻

勵甫冠以舉人考授內閣中書成進士由庶常改知縣

再改金華府教授乾隆丙辰以博學鴻詞授翰林編修

典福建山西貴州試歷左贊善假歸不復出錦於書無所不窺於箋疏考核尤精詩學韓蘇書法瘦硬如其人著有毛詩說饗禮補亡夏小正詁及絳跗閣詩文集伊志

徐天麟字上符雍正甲辰進士由庶常改部郎以憂歸保舉授建昌府十年為政清肅拔士之秀者親為講授嘗言人而圓不可以為人文而圓不可以為文人以藝謁必延之有假此進訟牒者立召學官予夏楚士氣益振決獄平允富家有命案賄天麟不得百計營上游翻其案遂被揭公論拂然

召見以原官用擢慶陽府旋內補刑部貴州司員外引疾歸約

同里沈青崖移居河南輝縣之百門泉凌大出集

范燦字電文秀水籍寓居烏程之南潯雍正甲辰進士授庶常改知大興縣歷萊州安慶知府擢江南廬鳳道轉河南布政使調直隸有實倉儲理溝洫等事疏並

允行尋擢湖北巡撫調安徽入為副都御史時同官奏以命案盜案之多寡為督撫殿最部議已准燦謂啟諱命諱盜之漸不可行

上皆是之晉工部侍郎告歸

高宗南巡

賜御書松巖樂志及耆英介景額以壽終伊志

王霽字介庵博極羣書居官能行實政初知祁陽縣事祁陽本三浯鉗鉞地甫經燹招集拊循民樂歸業調靈邱地薄雲中雁門塞外俗號難治以治祁陽治之累擢淮安船政同知山清外河同知有能稱仕至東牟知府東牟人士請祀名宦祠著有偷閒集子璋璣璣另有傳璋字予鬯隨霽任究心服官利弊以貲丞福建興化郡洊升同知所至有聲嗣以母老歸養著有安流舫存稿孫元鑑字寅亮號抑齋蚤歲有才名乾隆辛未迎

鑾獻詩賦荷

恩遇以明經終所著鷺溪草堂詩

賦諸宮詹錦亟稱之曾孫澄字清宇號橘堂克紹家學

後秉鐸台嚴諸郡有橘香堂稿

王氏家乘

王璣字象天康熙末以例授真定縣內陞歷戶部郎中出爲常鎮道調延建邵道擢光祿寺卿時臨晉村堡有製器械備盜者吏休以罪匿弗敢出捕之急益懼更以屠戮煽惑之鄉愚皇皇各執器械以俟當事謂民變脅以兵數月矣璣奉

命至撤兵召諭不三日而解繩七人法餘盡釋轉通政司晉戶部左侍郎攝江南巡撫罷歸乾隆辛未

南巡給鴻臚寺卿銜著有復初集燕山雜詠等種

伊志

褚菊書字榮九以舉人効力江南河工授寶山縣會大風

嘉興府志 卷五十一
雨害稼海潮入城傷民廬菑書力請於上官得普賑委
勘通州災濱海民籍與竈相半菑書議民捐賑民竈捐
賑竈民捐不足發社倉竈捐不足發義倉調濟得宜全
活甚衆以擢知滁州政暇與滁人講學賦詩脩前賢故
事引疾歸著易經象數臆解讀杜臆說投筆齋集胎產
須知痘疹集要等書

盛支焯字賁園以舉人出爲知縣年六十矣試融縣橫州
補貴縣以憂去補葉縣鞠獄不刑求必宛曲以得其情
澠陽有實死于水而謂丁二妮毒之者裕州有黃得都
致李王氏縊死而狡不承者支焯並爲覆勘得雪年七

十歸以父所撰徵獻錄有闕漏爲補綴之而著所自出

又輯家乘若干卷

伊志

盛熙祚字晴谷支焯弟以監生保舉發廣東署靈川縣縣
界交趾深山密箐易藏奸熙祚爲申嚴保甲請添設巡
檢分防之補龍川創尊經閣聚經史諸書以造就學者
成進士四人蓋縣無甲榜百年矣郡守某以熙祚無所
獻納陰列條件送上官排之布政甘恭恪公廉其誣得
白未幾守卒家被累熙祚爲周恤其孥連平州有疑獄
守委和平令某具讞上臬司辭不服委熙祚覆勘擬改
凌遲予杖寃始白熙祚廉俸所入輒分以助宗黨卒之

日無餘資

伊志

沈青崖字良思雍正癸卯舉人官至開歸道青崖先以監司任軍儲有倚撫之者繫獄幾數年子敦愨訟於部

上知其冤釋之仍官監司終以議論梗直爲大吏劾罷在獄時

著有五經明辨錄綱目尙論編

伊志

金作楫字濟庵以進士選清溪縣未抵黔而題補有人攝天柱縣縣有黃花銅廠開米輒貴作楫封之而逐諸匪類價頓平攝鎮遠縣時經略張廣泗駐鎮遠治苗頗用重典而作楫承審苗案未嘗失入擢永豐州內陞厯驗封司員外引疾歸

伊志

沈光會字士行以幕友保舉知長洲縣鞫獄曲盡人情吳人號沈青天調山陽縣擢高郵州於河工漕務利害得失廣稽曲詢後以酌添三壩一議爲河使者所劾改發福建頃之河防大決臺臣以光會先見露章直之有

詔詰責使者而光會已以足疾告家貧如洗所著有安瀾文獻

夢游錄內分治獄條議啟牘書問雜著閒吟凡六種

伊志

楊時敏字遜峰雍正十三年以州同投効江蘇巡撫派令清查常熟縣積欠錢糧銀米八萬有奇時敏一一清釐不事敲扑而民樂輸將一年竣事巡撫欲特題保用時敏以母老且病謝歸

伊志

秀水列傳

六

陳學沆字山苑原籍桐鄉改秀水康熙癸巳舉人知湖北
蘄水縣攝蘄州以廉能稱時有三疑案積不能剖學沆

悉取決焉

吳志

翟堯佐字亮工知單縣均徭役除羨稅治董家口水患興
築廢堤以禦之人號翟公堤子枚吉知隨州能詩有蠡

洲詩鈔

伊志

馬湘字芷鄉知鄆縣歷署宜賓富順內江及打箭爐同知
在鄆捐俸開嶺路行者歌於途有范姓兄弟奸案上官
欲駢戮之湘以罪疑力爭不得遂被劾邨人歎息送者
萬計湘好吟著有就園詩艸

伊志

沈昌寅字升伯七世祖思孝明神宗朝以直諫聞詳嘉興
列傳祖德亮拔貢生昌寅與弟昌宇少受業於同里賀
光烈昌宇先舉雍正甲辰鄉榜以師及兄未雋仍其下
帷讀書不赴禮部試丙午己酉以次捷乃就計偕明年
昌寅與弟同登進士昌寅授刑部主事補盛京工部主
事未久終於任昌宇字泰叔會試第一

廷試第二授編修典廣西河南山西試提督廣東肇高學政
粵中前有惠學使士奇士林尸祝之昌宇復條列規則
使之易循人翕然悅服稱復得惠夫子云昌宇兄弟素
友愛自兄之歿抑鬱不自勝歸不數年亦卒

伊志

張敬業字日乾性謹厚敦行誼講析儒先理義以教授學者輒成名雍正壬子舉於鄉考選中書監督通州南倉清慎自矢除典籍記名以部曹用告歸著有篁園吟草

拙存居文集

伊志

鄭虎文字炳也乾隆壬戌進士授編修典河南鄉試督湖南廣東學政歷左贊善歸主徽杭書院十數年卒虎文於學靡不通衡文兼攬衆長無遺美少孤竭力養母母病禱於神請減算畀母竟如所禱事兄如父撫諸姪諸甥如子分衣共爨五十年如一日素以經濟自負嘗願爲知縣謂縣令切近民易知民間疾苦一令賢則一縣

治天下之令賢則天下治人以爲名言著有吞松閣詩文集季子師雍讀書過目了了而其意邈然視文字若糟粕者十五舉於鄉十七天

伊志

錢載字坤一父爇性閒曠貧至不舉炊不知也載自少不耐爲舉業文爲之輒崛奇不合時樣故不售載不顧益肆力於古漁獵百家尤以詩爲命獨窺古人奧絕鑿不已既以副榜薦博學鴻詞薦經學皆不獲壬申始聯捷年四十五矣由翰詹累擢禮部左侍郎充會試同考官者三典江南江西廣西鄉試凡五又視山東學

命往秦蜀祭告

上書房行走癸卯致仕癸丑卒於家載詩凌紙怪發險入復

入橫出復出於古不名一家更憇萬里游壯觀嶽瀆吸

靈奇之氣而張之故老益肆益硬載名自未第時已達

天聽受知遇立朝三十年秉正不阿終其身食貧不知貧有父

風性直常折人過而周人急如不及晝其餘事世珍之

著有礬石齋詩文集

伊志

王又曾字受銘少與錢載以詩鳴里中有錢王之目乾隆

辛未

南巡召試一等授內閣中書甲戌成進士授刑部主事未久以

疾歸越歲卒嘗語錢世錫我詩適興而已詩家精深華

妙森嚴密栗之境未能也然天真爛漫隨手拈得頽唐

中見風致古人佳處往往在是必以苦嚴為森森之正

味執半山山谷法苛以相繩亦刻舟矣其自道如此詩

曰丁辛老屋集有前後二刻子復字秋塍國子生五試

北雍不售考職歷知偃師縣著晚晴軒稿畢沅序

伊志

萬光泰字循初乾隆丙辰舉博學鴻詞試罷旋舉鄉闈後

以梁相國詩正續脩通考延光泰董其事卒於京寓年

三十九述作甚富全太史祖望盛推之為誌其墓語見

經籍志光泰與同里錢載汪孟錫為文章性命之交汪

刻其詩集傳於世兄光謙字敬懷以進士知陽山縣撰

陽山志有條理痛弟之亡因公假省母母歿遂不出

伊志

盛世佐字庸三以進士發貴州署湄潭縣訟牒過目不忘

授龍里縣未任丁憂補發雲南攝麗江并務以運銅勞

瘁卒於途年三十八生平邃於經尤熟精三禮撰有儀

禮集編積二千翻依經分十七卷不欲於一篇中橫隔

也謂士冠禮自不醴則醮用酒以下即記士相見禮自

士見於大夫以下即記凡註或連傳經為傳隔之類悉

為更定至於鄭賈及楊氏之圖有失者胥正之刻綱領

二卷附勘正監本石本補顧炎武張爾岐之闕宋元來

說禮家未有若此之精粹者

伊志

汪孟錫字康古弟仲鈔字豐玉家故饒至孟錫時漸落又

兄弟不事生產遂貧而先世裘杆樓萬卷之藏書故在

孟錫兄弟蒐討其間銳意攻詩詞又與錢侍郎載王刑

部又曾萬孝廉光泰及祝舍人維誥陳明經向中朱孝

廉麟應陳明經經業往復講習爭相濯磨極一時應求

之盛乾隆庚午孟錫兄弟舉於鄉癸酉仲鈔卒年未及

壯孟錫於壬午

南巡召試授中書丙戌進士仍官中書轉典籍擢吏部主事嘗

預脩

御批通鑑輯略充方略館一統志館纂脩所著古文辭及經術

金石雜錄稿甚夥已刻者有厚石齋詩集仲鈞有桐石齋詩集而孟銷詩尤精簡刊落枝葉卒年五十子如藻如洋自有傳

伊志

朱坤字中黃以舉人補蕭山教諭係舉授博平縣以疾歸為學不務詞章服習有宋諸儒之言私淑鄉先輩張履祥氏校勘其遺書稱弟子於甯化雷公鉉常以書往復講論不已在蕭山上書言縣之西江塘宜改築石塘以資捍禦長山閘籠口閘諸處宜脩濬以利導下流反復數百言洞悉機宜未允行後十三年而西塘潰在博平

值

南巡縣官當治道坤騎匹馬從四五人往相視而縣人已爭荷

畚鍤掃灑之具先坤所行處道悉平治其民易使如此大興朱筠誌坤墓謂古之學者而當世之循吏也著有

靈泉筆記等種

筒河文鈔

賀基鞏字裕垂以進士授新鄭縣治尚清淨不爭紛擾而凡有關利害者必竭力為之舊例每年買穀數百石納府倉民苦之鞏基力請于上官得永免期年大治未幾遘疾士民為泣禱者踵相接及卒縣人賻之乃克舉喪

新鄭縣志

唐淮字晴川少貧苦學庚辰成進士由翰林轉御史時翰

嘉興府志 卷五十二
林保舉御史有甫除官而列名者疏請以三年爲限得
允行典雲南試以疾歸伊志
錢受穀字黃與乾隆丁丑

南巡召試授中書庚辰進士由庶常改部歷郎中軍機處行走
出爲漢興道值緬匪跳梁毅勇公明將軍瑞兼總制督
師討之奏請受穀從事由漢中馳抵永昌授迤東道調
迤西從明公軍發永昌出宛頂破柵十六踰天生橋入
象孔迷失道鑿戰蠻化賊益衆明公令護案牘先行而
自殿後明公歿於軍受穀入關復從經略傅公恒進兵
駐蓋達策理糧務旋復攝迤東道治軍需以勞卒於官

所著詩文未梓

伊志

盛百二字相舒熙祚子舉人讀書穎悟詩文外博求天文
勾股律呂河渠之學必研其故撰尙書釋天一編五易
稿而成所論說於陰陽之理性命之旨治亂得失之故
無不洞若觀火嘗爲淄川令一年以憂去遂不仕蓋本
無宦情也然其爲政靜而不擾簡而有要聽訟不多言
而人自服查覈歷城濟陽災戶了了無遺雖能吏莫之
及晚居齊魯間主書院十數年多所成就著有柚堂筆
談等十數種伊志

沈琳字潤輝少受業於杭太史世駿父雍嘉詳孝義傳琳

乾隆辛巳進士授武選司主事洊擢員外郎中琳久任
 選司熟成例吏不能奸論事于上官直言無隱以故皆
 委重焉改職方郎中陞御史轉吏科給事以光祿寺少
 卿終琳孝親如其父事叔謹與從弟同爨數十年無間
 言兼通醫求診視者雖臧獲無不應伊志

汪如藻字念孫舉人考授國子監學正值四庫館開獻家
 藏書一百三十七種得

倭旨充甲午順天鄉試同考官以乙榜與選異數也乙未成進

士入翰林出知撫州府終山東糧道伊志

汪如洋字潤民孟錫子為仲鈔後乾隆庚子會試

廷試皆第一授修撰入直

上書房典山東試視雲南學政年四十卒如洋少侍所後母
 不獲親孟錫教而能自勵學詩文雄駿無前通籍後學
 益進益冲然不自矜在滇弊絕風清文無不經目者諸
 生或曳敝裾袖文以謁必為之口講手批反覆開導不
 倦滇人士謂父師之教子弟弗及也著有葆冲書屋詩
 詞集伊志

錢世錫字慈伯侍郎載子方數歲冬夜溫經母張夫人蒸
 飯以待無侑飯物謂世錫曰白飯如棗花香無用魚肉
 也世錫欣然食已仍攤書坐破氈一燈如豆滿樓讀書

聲及冠踔厲風發文壓儕輩而運不偶九試乃得舉又十年成進士改庶常授檢討丁母憂補官尋以父致仕家居乞養十年父歿踰年世錫亦歿世錫性真摯父官貧常館於外以佐養遍歷燕趙齊魯雲朔得山川之助其詩豁達清快無一字剽竊而神理似東坡與堯石齋集性情同而面目異也游京師雖未第名噪公卿間既館選值父教習庶吉士英文肅公廉語曰汝入翰林而上命汝父教其子瓌頌文章世濟厥美惟汝勉之世錫終養後問業者屢常滿因材誘掖必盡其忱著有錢檢討集及

雜著若干卷

伊志

莊肇奎字星堂祖籍常州遷秀水以舉人授教諭俸滿除施秉縣陞雲南永北同知署開化府補廣南府陞迤南道以制府案牽坐得罪發伊犁數年補巴里坤撫民同知擢惠州府移肇慶陞惠潮嘉道潮大水米騰貴發倉平糶且請督撫以下各捐俸賑濟而親理之尋陞按察使再陞布政使卒於官

伊志

朱休承字伯承稻孫之孫以舉人挑發攝三水武功及西安府清軍同知事治案有聲補城固偵獲鄰省巨盜數人例得薦力辭之已而署郃陽再署富平白水白水瘠而貧方請緩徵事未允而城固民數百人赴御史臺乞

還休承從之會攝篆者審邪教案株連無辜數十人休承至白其冤後將以疾告為父老攀阻者一年比去有步送至興安者著有居官隨筆二卷

伊志

吳奕傳字紹虞舉人授樂至縣不攜家以二僕從居官有慈惠聲甫十月卒貧無以斂制府李恭勤公世傑察其賢屬守以下助之始克舉喪歸之日民送數十里肖像

文昌閣下祀之

伊志

朱乾字贊文乾隆辛酉拔貢館大興朱氏故學士筠尚書珪皆嘗受業焉性孝飲食必思親暮年主講鴛湖書院七十一齡丁承重祖母于氏艱猶哀毀骨立著四書集

成春秋纂傳關中雜記奏議選管子訂譌文選訂譌周禮正譌楚詞古音蓮嶽臥遊水經注箋揚雄年譜考定

三略樂府正義等書

朱氏家乘

陳于上字霽園少力學夏畏蚊身披重葛足置瓦缶中讀不輟舉乾隆戊辰進士宰江西新昌縣邑溺女為創建保嬰堂刊示條約俗以丕變巨窩許某久漏網訪得之盡法懲治攝四川涪州牧離地二十里險灘名鬼龍關開鑿緯路即以鑿石修鼓兒城稱為陳公路終長壽知縣著有眠遲集詩揖青堂文稿

新勝瑣志

吳春澗初名蔣源字朗陵先世杭人後遷新勝鎮少嗜學

讀書廣陵僧舍秦礪泉學士索閱詩文詫為異才以名
孝廉參贊幕府出宰寶應縣聽斷如神一時奸暴號五
虎十三鷹咸為斂迹寶應地窪下疏通溝洫修築插洞

農田漕運均利賴焉

新勝
瑣志

陳經禮字慶施元朗從子乾隆丁丑進士知沅陵縣縣置
郵凡五站軍興旁午士馬芻糧支應費絀輒鬻產補之
不以累民大吏廉得其實保陞永綏同知

于
志

張慶源字崑白乾隆壬申舉人辛巳進士歷任山東河南
知縣多治績主講江西鵞湖書院著四書隨課題解

于
志

楊志鸞號拙庵由舉人挑選補湖南益陽知縣政事明決

平反冤獄培植士林委赴滇省辦銅歿於差次滇藩王

公楚堂為作行狀著有金石釋文及詩賦若干卷

于
志

何振權乾隆壬午舉人由教職陞陝西南鄭知縣時川楚

教匪滋事軍書旁午四鄉已遭蹂躪振權招募鄉勇千

餘人嚴密堵禦保障之功關中稱最調署渭南華陰劇

邑及鳳翔通判皆著勞績以疾乞歸宦橐蕭然因素精

醫術藉贍餘年

于
志

盛世綺號對展由縣佐軍功擢知縣晉涿州知州所至皆

有善政明於折獄省會疑難案必奉委審多所平反性

伉直不援上任涿州八年不調卒於官素工篆隸多藏

名人手蹟碑帖撰所見碑銘時地考四卷于志

朱休度號梓廬明朱文恪裔孫淵源家學該洽宏通詩文

並造上乘著有壺山自吟稿梓廬舊稿六卷由舉人官

山西廣靈知縣政事可傳者甚多有循良之譽嘉慶十

二年經山西巡撫于志奏入祀名宦祠

汪如淵號筆山由翰林改御史陳奏事件多准施行嗣以

卿貳擢山西按察使順天府尹嘉慶初畿輔水旱頻仍

辦理賑務民沾實惠旋擢廣東布政使

上諭以素稔汝辦事勤慎操守甚好須始終盡心任事察吏安

民爲主如淵至粵東益加奮勵未久卒於官于志

錢寶甫原名昌齡後以字行載孫由翰林出守雲南徵江

府地苦澇築高堤植柳萬株水患以息調雲南府審斷

平允振興學校賑卹災黎郡中百廢具舉洊擢至山西

布政使所至皆著善政以疾乞歸而卒于志

唐作梅號北枝由江蘇縣佐旋擢縣令壬子歲祲寶山飢

民聚衆劫掠大府檄權縣事皆云須帶兵往作梅單騎

抵任不動聲色但執爲首五人置之法衆悉解散卽發

廩以賑饑築塘以防永民情悅服實授武進縣興利除

弊政以化導爲先有巨紳告子不肖爲誦王中書勸孝

歌感悟涕泣而去毘陵人至今稱述之于志

葉維庚號兩垞由進士改庶吉士散館出膺民社初任江西新喻又任江蘇寶應江陰所至皆有仁廉稱境內水道尤勤心治理雖逼近淮黃居民不至流離失所大府薦牧泰州已疾亟矣平生酷好學問文章居官稍暇猶手執一編所著有紀元通考十二卷鍾秀山房詩文集若干卷三國地理考若干卷雜著十數種于志

馮事硯字遠操喜讀史鑑古書爛琴棋能書畫初為府掾吏以文藝受知郡守袁公後任松江府庫捕檢校一攝

海防篆兩署華亭事俱有政績

新陸瑣志引馮浩橫塘紀聞

金衍宗號岱山峰嘉慶庚申科舉人謁選得縣令改就學博

任臨安敬教勸學變通全祖望尊經閣祀典捐俸脩閣倡祀字祖經師於己配兩廡諸儒外增王氏弼至陸氏德明二十一人洎教授溫州見 文武廟不祭後殿

議增如制復奉祀許鄭二儒栗主於倉聖祠與錢泰吉議論孺悲不得從祀往復千言考核典禮實事求是甌地濱海咸豐癸丑夏颶風淫雨奸民乘機劫米穀民斷炊商罷市勸建義倉積穀至數萬石逮壬癸年髮逆圍城賴有倉穀濟餉郡人德之咸豐甲寅重游泮宮後遂乞歸己未重赴鹿鳴蚤歲噪詩名以銀河篇見賞阮學使元晚自哀輯思貽堂詩文稿甌隱芻言尊經閣祀典

錄子鼎燮號小岱由增廣生保舉訓導辛酉署臨安學

督團力竭殉難卹祀昭忠祠 沈維鑄思貽堂文序附新纂

沈樸字敦齋嘉慶癸酉科舉人嚴州府桐廬教諭持身狷

介熟精三角八弧術推步占驗綜貫中西星學恒登奎

星閣攜筆視食榼袖算器梯居之每星輝月朗輒至夜

分不下樓道光庚戌休沐歸戒所親曰熒惑入南斗分

野應揚州域不十年江浙將焦土矣後卒如其言手鈔

天官書不下十餘篋因兵燹燬士林惜之 新纂

胡祥麟字仁圃嘉慶癸酉舉人先世以武秩顯自崑山改

籍秀水少游陸中丞燿幕喜切問齋文鈔講求實學治

經好深湛之思得張惠言虞氏易義消息衍其說有專

書詩學楊鐵崖李西涯派詠史諸樂府尤奇崛性鯁直

與締交深規過不稍恕錢泰吉日為諍友著有省過齋

詩鈔易消息圖說 錢氏曝書雜記

錢聚仁字味根嘉慶癸酉拔貢戊寅順天舉人充 武英

殿校錄期滿議敘知縣選授四川彭山縣修李冰六堰

門六水門疏張公渠故址灌溉郡田有功水利出庫存

社倉穀價銀買田三百餘畝為濟倉田積歲輸穀做常

平法收斂備水旱整飭江源書院課士溫經朔望躬教

督之平時服膺漳浦黃忠端學行繫年為譜隨時觀省

師法遠且大故淡於仕進早告歸主講篤湖書院道光
已酉籌辦荒賑尤多實惠焉錢泰吉撰墓表

沈濂字景周早失怙大父范孫著有詩學汝為經明行修
造就濂學舉道光壬午孝廉癸未聯捷籤分刑部主事
補雲南司升安徽司員外郎歷轉山東廣東司郎中出
守江蘇鎮江府時讞局案牘山積判結靡遺巡撫李星
沅廉其能奏調江甯府典郡五年報最陞署漕徐道豐
蕭邛宿間剽掠素豪橫濂至鋤奸擊暴著有威名咸豐
紀元因豐北決口削職自念身任河務莫挽狂瀾深自
引責留工効力役竣遂陳假歸少噪文譽尤精考訂隨

筆紀錄有懷小編雖掇拾瑣屑而網羅淵博亦深甯夾

際之支流弟洛嘉慶丙子舉人溫州樂清教諭因迎養

慈親崎嶇路遠未期告歸先濂卒行述

朱鴻字雲陸乾孫乾隆己酉充選拔領鄉薦嘉慶壬戌入

翰林授編修纂樂志天文志時憲志又撰會典圖說欽

天監典例於句股割圓弧三角推步諸法融貫中西擢

御史給事中請修大清通禮定史館章程在吏科偕

部臣奏展選員赴任程限皆關政體之大者巡西城時

毀夾道居巫覡私廟所遺旗杆數百根變價施悅生堂

贍老民道光丙戌選授湖南糧儲道以忤巡撫康求退

不許乃改爲候補道權掌長沙城南書院造就生徒講求根柢著有考工記車制參解圖說聲音譜聲字薈錄名物偶拈舉數並各種算學書宦游不攜眷屬繼妻俞氏與鴻舉案踰月焚香茹素終其身罷官後就養子舍

端坐而逝

朱氏家傳

朱應元號慎庵鴻子道光壬午舉人丙戌入詞曹散館改部時樞密曹文正素無私誼知應元靜默寡交考授軍機章京旋擢御史辛丑充禮闈同考官得士邊葆誠張桐梁國瑚顧文彬皆知名咸豐辛亥選授甘肅慶陽府護平慶涇道遇事機警獲刀匪馬建品及口外巨匪號

白虎者殲渠散脅同治壬戌任西甯府值逆回馬朵三等滋事親冒矢石守城積勞繼調蘭州府病卒秉性恬淡不趨炎熱故雖樞垣十載臺省七年寒素如故外用後守西甯辭保舉頗有聲於甘涼

朱氏家傳

盛時霖字方仲父善持嘉慶丁卯捷京兆試後客直隸遷安縣病歿凶耗至時霖天性肫篤泣血目爲之眚聽母氏褚教弟鑽讀學業得不輟弱冠歷幕燕魯吳楚恪守母訓游不廢學窮能律身八字箴登道光甲午鄉榜甲辰大挑二等署理於潛教諭監理杭州崇文書院兼掌文瀾閣書籍奉母娛六橋三竺間深以湖上校官爲

樂艱去服闋選金華永康縣教諭咸豐辛亥以孝廉方正徵召年老辭 廷試並乞歸庚申家破慮先世文集散佚編存總目以延緒餘比聞 顯廟上賓雖避寇流離蓄髮守制言輒嗚咽遭際時艱悒鬱至壬戌秋卒所著詩名清芬閣稿

盛氏宗譜傳

莊仲方字芝階肇奎子嘉慶庚午科順天舉人官中書舍人澹於榮利愛西湖山水以搢紳奉委管理葑田水利瀟灑出塵晚歲歸居角里街築映雪樓藏書五萬餘卷嘗論總集自文選以後唐北宋元明選家均有成書惟南宋與金缺如鄉前輩沈嗣選果堂著有南宋文鑑又

復僅存門目乃哀集成之名曰文範又輯全宋文雅碧血

錄古文練要均稱收羅宏富

新纂

錢爾琳字特齋恩貢生平居恂恂持躬廉儉乾嘉間錢氏多顯秩爾琳授徒自給不肯通尺書干求館破石蔣氏垂二十年坐榻幾有跌痕熟精澆水通鑑歲七十門弟子欲為壽堅卻之曰我讀溫公書歲數周千載若旦暮耳我年何足道楷法端嚴不屑欹側亦肖其介節也

泰吉撰墓表

錢聚朝字曉廷善揚子幼孤貧恒煮糜供母自啖麥餅度一日無寒乞相綺歲能文中道光乙未鄉榜大挑選授

嚴州府淳安縣教諭初秉鐸值歙寇逼隣境同官有捧
 下鄉募團檄邀與俱者辭曰導我生路意良厚也卒笑
 置之遂移榻縣廨與縣令陶雲升議堅守抱疴督團閱
 三年防稍緩乃乞假歸又值浙西疆事棘奔走滬淞鬻
 畫餽口然素性耿介要人俗子有以財餌者雖寸縑不
 屑落筆崇尚氣誼境窶恒飲助人房薦畢令華珍僑寓
 郡城每至斷炊重師生義時作畫售金以供著有養真
 齋詩集梅邊吹笛詞稿

述行

嚴炳字星巖道光癸卯舉人六歲孤經書皆母氏指授成
 名後肆力於古文宗桐城派有手錄姚惜抱古文辭類

纂評本兼精書畫為人和而介杜門授徒隻字不入官
 署庚申賊氛戒嚴炳屢勸母氏徙避弗從及城陷炳急
 覓刃將自剄忽聞母嗽聲心暴痛刃遽墜地比賊至脅
 母去炳以孝養故隨老母所至泊常州母病歿危城中
 殞殮畢遂以身殉賊雅重炳名不强加偽命即埋棺坏
 土然齋志以歿可哀也已子寶森庠生同死於難

錄有傳

浙江忠義

沈照字燭門父陳夏歲貢生窮經皓首造就多人照稟庭
 訓登道光丁酉拔萃科授平陽教諭丁艱歸家無宿儲
 館於海甯蔣氏仍鬻文以自給庚申陷危城中賊將脅

嘉興府志 卷五十二
之去堅不從平居詞氣溫溫至是忽瞋目詈曰我亦職
官顧從賊乎殉節未踰時旋選授新城縣教諭事聞乃
蒙 卹襲子應鏘庠生卯角時文采飛揚決爲遠到器
亦死於難 忠義錄
有傳

沈昭興字硯怡以諸生游福康安戎幕軍功銓發四川時
讞局有爭墓疑獄相持百數十年昭興謂蜀自獻忠擾
後靡有子遺嗣後皆客戶奚爭焉片言折之兩造詞窮
獄遂息以才游擢屢躋屢起仕至瀘州知州告歸咸豐
壬子金陵告警禾中耆老以協防疲缺爲憂昭興慰之
曰兵主乎氣賊氛雖張劫運主之吾西戎閱歷久矣氣

衰賊立潰也果符所言精書法晚年猶能行楷壽至九

秩 新纂

馬景禹字訥庵增貢生壯游楚越授經課嚴爭賓之爲人
師晚歸里咸豐庚申寇至趣細弱出避自恃高年無他
慮堅守蹲賓橋老屋賊覘知爲儒置刃於頸而礪之脅
使司書記不屈與妻莊氏同遇害景禹績學不得志論
及塲屋事骯髒不平比聞賊熾尤慷慨裂背卒殉之事

聞

賜卹襲

長白如山
撰墓誌

高均儒字伯平廩貢生先世閩人均儒始占籍秀水幼奉
車氏慈訓念母劬勞終身布衣治經精聲音訓詰確守

嘉興府志 卷五十二
段懋堂王懷祖六書之義文章師法桐城服膺葉采注
近思錄校刊以勸後學咸豐間客游兩淮河帥楊以增
漕帥吳棠爭幣聘屬勘書籍請碑銘墓誌者屢恒滿戶
外同治時掌教杭州東城講舍恥驚講學虛名在塾疾
終貧不能斂郡守陳魯率肄業諸生經紀其喪焉著有

可亭文稿

新纂

杜文浩字少牧江蘇候補道文瀾仲弟幼入鄂習法家言
以議敘典史洊保知縣賞帶藍翎始釋褐署湖北孝感
縣丞駐小河地夙椎魯倡脩雙峰書院培植士林署襄
陽縣雙溝巡檢講求捕務弋獲巨獫寘諸法移任沔陽

州判民猶攀留在沔陽集團仙桃鎮事戴隨大府防堵
蕪黃調知廣濟奸民方四象應賊援星夜計擒單騎入
村落解脅從觀感者爭以綵絹繫馬前遂密參軍議留
蘄州營咸豐三年殉難田家鎮其死也職司文案非有
城社之責乃沙塲喋血骸骨無存 卹贈知府銜入

祀湖北昭忠祠

吳雲撰墓表

朱榮恩字少廉廩生父濂舉道光壬辰鄉試第一榮恩少
孤力學耐貧授徒庚申賊踞郡士流在圍城困乏者賊
以財餌檄令應試聞榮恩名將招之懼汗僞命丐服出
城匿避國界橋糧盡採桑葉嚼之軀體素偉善飲啖至

是餒不能自存鄉有散賑米者勸其婦高氏往取婦卻

之翌日與夫閉門同餓死

浙江忠義錄
梅里殉難錄

鄭觀壽字星蓮父士喬幕游閩廣著雪樵山人詩稿觀壽

登道光庚子 恩榜同治癸亥以知縣揀發福建左恪

靖伯才之調營務文案委讞局獲土匪研鞫再三解脫

免死者數十人乙丑權甯德篆值旱荒請帑賑不足捐

米五百石補仙游縣未赴任咯血卒歸橐蕭然著滌生

詩文稿新纂

